

ՀԱՍԱՐԱԿԱԿԱՆ ԵՎ ԸՆՏԱՆԵԿԱՆ ՀԱՐԱԲԵՐՈՒԹՅՈՒՆՆԵՐԸ ԳԱՄԻՐՔՈՒՄ

Ա. ԸՆՏԱՆԻՔԻ ԿԱԶՄԸ, ՂԵԿԱՎԱՐՄԱՆ ՁԵՎԸ ԵՎ ԱՅԼ ՍՈՎՈՐՈՒԹՅՈՒՆՆԵՐ

Հայկական ընտանիքը Հայաստանի երկու հատվածներում՝ արևելահայերի և արևմտահայերի մեջ մի ընդհանրություն ունենալով հանդերձ, իր նիստ ու կացով և սովորություններով ունի որոշ առանձնահատկություններ: Այդ վերաբերում է նաև գամիրքահայերի ընտանեկան կազմին: Եվ դա բնական է, քանի որ այդ երկու հատվածները իրարից շատ հեռու լինելուց բացի, դարեր շարունակ գտնվել են և քաղաքական և սոցիալական բավականին տարբեր պայմաններում:

Քաղաքային հասարակության մեջ, եթե տնտեսական միավորը արհեստավորական փոքր ընտանիքն էր հանդիսանում, ապա գյուղերում առավելապես կազմում էր նահապետական բազմանդամ ընտանիքը: Վերջինս մինչև 19-րդ դարի երկրորդ կեսի սկզբները, հատկապես երկրագործությանը պրազվող շրջաններում, ընդհանրություն էր կազմում այնքան ժամանակ, քանի դեռ թուրքական լծի տակ գտնվող Արևմտյան Հայաստանի գավառներում գոյություն ունեին հողօգտագործման՝ Հագգը-գարար-ի էախնական ձևը¹: Գյուղական համայնքի բնակչությունը համայնքային հողից մշակում էր այնքան տարածություն, որքան հնարավորություն և միջոցներ ունեին, և մըշակված հողը պահում էր իբրև հագգը-գարար-ով տրված իրավունք: Ուստի և հող-

օգտագործման այդ ձևը, եթե մեկ կողմից նպաստավոր պայմաններ էր ստեղծում և պահանջում միացյալ ուժերով աշխատելու, ապա, մյուս կողմից, դեռևս հողի անհատական սեփականության չգոյության պատճառով, գերդաստանները չէին ձգտում բաժանվել, տնտեսական ուրույն միավոր կազմել, քանի դեռ գյուղական տնտեսությունը բավականին պարզունակ տեխնիկայի պայմաններում մեծ թվով աշխատող ձեռքերի և միջոցների կարիք էր զգում: Բացառիկ նահապետական ընտանիքներ էին լինում, որոնց անդամներից ոմանք արհեստների մեջ մասնագիտանալով, բաժանվում էին:

19-րդ դարի երկրորդ կեսից սկսած ըզդալի փոփոխություն է մտնում գյուղական կյանքում: Ղրիմի պատերազմից (1853—56 թթ.) հետո, անգլո-ֆրանսիական կապիտալիստների պարտքերի տակ կթած հետամնաց Թուրքիան հարկադրված էր մի կողմից եվրոպական մոնոպոլիստներին տալ աղի, ծխախոտի. կոնցեսիաներ ու երկաթուղային գծերի կառուցման և շահագործման իրավունք, մյուս կողմից փնտրում էր եկամտահարկի նորանոր աղբյուրներ: Հենց այդ ժամանակ էլ սուլթան Մեհմեդ 1858 թ. հատուկ հրամանագրով (իրատե) հաստատվում է քափու-ն, այսինքն՝ հողի անհատական սեփականության իրավունքը: Հետևաբար, եթե մի կողմից նոր հողամասի ձեռք բերումը փողի հետ կապված լինելով, մատչելի չէր բոլորին, մյուս կողմից էլ վարելահողային տարածությունը բազմացող

¹ Ա. Մկրտչյան, Հողային հարցը Թուրքահայաստանում, «Գործ», Բաքու, 1917, № 4, 65—67:

ներգերդաստանային ընտանիքների անդամներին չէր բավարարում: Բացի այդ, հողը որպես անհատական սեփականություն պարտքերի դիմաց բռնագրավման ենթակա լինելով, գյուղատնտեսության մեջ պարապող մեծ ընտանիքները, հետզհետե ղրկվում էին իրենց անհրաժեշտ վարելահողերից: Այսպիսով, սակավահողությունը ներգերդաստանային ընտանեկան զույգերին մղում էր տարբեր պարապմունքների, հետևաբար և բաժանման: Այդ հանգամանքը հայտնի ազգագրագետ Ծ. Լալայանը նույնպես իր ժամանակին ճիշտ նկատելով, նշում է, որ գերդաստանի ներքին տրոհման ամենագլխավոր պատճառներից առաջինը՝ վարելահողերի սակավության պատճառով գերդաստանի անդամների տարբեր զբաղմունքներով պարապելու հետևանք է:

19-րդ դարի վերջերին կապիտալիստական հարաբերությունների զարգացման հետևանքով, դեռևս նահապետական բազմանդամ ընտանիքների տնտեսության ներսում սկսում է սաղմնավորվել փոքր ընտանիքների անհատական սեփականությունը: Այսուհանդերձ, պետք չէ ենթադրել, որ փոքր ընտանիքը, որպես ուրույն տնտեսական միավոր, Գամիրքում ընդհանրապես առաջացել է միայն հողի անհատական սեփականության հրամանագրի հրատարակումից և կապիտալիստական հարաբերությունների զարգացումից հետո, գերդաստանների տրոհումից փոքրաթիվ ընտանիքներ միշտ էլ եղել են գյուղերում: Ազգագրական նյութերը հիմք են տալիս ենթադրելու, որ դա գոյություն է ունեցել շատ ավելի վաղ անցյալում: Այդ մասին են վկայում փոքր ընտանիքը բնորոշող՝ մեկ աղջիկ էրեկլեկի, չամ-քյուքուկի տեղական բազմաթիվ հեքիաթապատումները:

Հայկական նահապետական ընտանիքի տնտեսության ղեկավարման հին ձևը, նիստ ու կացը կենցաղում այնպես էին արմատացել, որ չնայած կապիտալիստական հարաբերությունների զարգացման հետևանքով առաջացած նոր պայմաններին, այդ հին ձևը դեռևս պահպանվում էր միայն որոշ փոփոխություններով: Այսպես, Կյուրինում

Ճեմճեմենց ընտանիքի հայրը թեև վաղուց մահացել էր, բայց ըստ հին սովորության, ամուսնացած վեց եղբայրները իրենց մեծ եղբոր՝ հաշեր աղայի գլխավորությամբ երեխաներով միասին (ընդամենը երեսուն հոգի) ապրում էին մեկ տնտեսության մեջ: Նրանք իրենց հողերը կիսրարության էին տվել և զբաղվում էին վաշխառությամբ և հատկապես գյուղերի հացահատիկի կապալառությամբ: Արաբկիրում Ղազանջյան Մարտիրոսը իր վեց ամուսնացած զավակներով (32 մարդ) մեկ տնտեսություն էր վարում, որտեղ տան մեծը հայրն էր: Հայրը և իր վեց զավակները զբաղվում էին պղնձագործությամբ, յուրաքանչյուրը կատարելով այդ արհեստի պրոցեսին հատուկ առանձին պարտականություն: Հենց այդ պատճառով էլ արհեստավորական ընտանիքներում ամուսնացած եղբայրները մեկ տնտեսության մաս էին կազմում:

Կյուրինում, որը գլխավորապես շալագործության կենտրոն էր, արհեստա-առևտրական գործառնությամբ զբաղվող տընտեսության ղեկավարման ձևը դարձյալ նույնն էր: Օրինակ, Չուլճյան հինգ եղբայրները, Չոքարյան չորս եղբայրները զբաղվում էին շալի արդյունագործությամբ և նրանցից ոմանք, թեև երկար տարիներ տարբեր քաղաքներում էին ապրում, սակայն մեկ տնտեսության մաս էին կազմում: Այդ հանգամանքը, մի կողմից, այսպես ասած, ընտանիքի ղեկավարման նահապետական ձևի կենցաղում ամրացված լինելու, մյուս կողմից տնտեսության ընդհանուր շահերի պաշտպանության հետևանք էր: Նույն ընտանիքում եղբայրներից յուրաքանչյուրը տարբեր մասնագիտությամբ զբաղվելով հանդերձ, վարում էին նույն գործի տարբեր պրոցեսները:

Կապիտալիզմի ներթափանցման հետևանքով, երբ առևտրական հարաբերությունները աշխուժանում են, Գամիրքի գյուղական տնտեսությունների՝ նահապետական մեծ ընտանիքների ընդերքում առաջանում է նաև մի յուրահատուկ երևույթ՝ փոքր ընտանիքի անձնական սեփականության սաղմնավորում: Բերենք բազմաթիվ օրինակներից մեկը: Հալիս գետի ներքին գյուղերից մեկի՝ Չեփնիի բնակիչ Բաթմանյան Գասպարի բազմանդամ ընտանիքը

² Ծ. Լալայան, Բորչալուի գավառ, «Ազգագրական հանգես», Քիֆլիս, 1903, 10-րդ գիրք, էջ 127:

բաղկացած էր նրա ամուսնացած երեք որդիներից և նրանց զավակներից, զբաղվում էր երկրագործությամբ, անասնապահությամբ: Տնտեսությունն ուներ իր վարելահողերը և անասունների հոտը: Վար ու ցանը, հունձը կատարվում էր միասին, սննդամթերքները ամբարվում էին տնտեսության շտեմարանում, սնունդը միասին էր պատրաստվում, սակայն երեք եղբայրներից յուրաքանչյուրը ուներ, բացի ոչխարի ընդհանուր հոտից, իր սեփական ոչխարները, որոնք տրվում էին կիսարուսթյան ձևով բուծման և ստացված մթերքը վաճառում էին ու ձեռք բերված փողը վաշխով շահագործում³:

Գամիրքում նահապետական ընտանիքի ղեկավարումը ներկայացնում էր այսպիսի ձև. միջնադարում, ինչպես հայտնի է, տնտեսության ղեկավարը հանդիսանում էր անպայման ընտանիքի հայրը և կամ նրա մահից հետո՝ մեծ որդին: 17-րդ դարի աշխարհագիր Սիմեոն Լեհացին իր «Ուղեգրություն» աշխատության մեջ խոսելով Սեբաստիայի շրջաններում նահապետական ընտանիքի մասին, գրում է. «և թե հայրն մեռան էր, մեծ եղբորն հնազանդէին»⁴: Դա այդպես էր մինչև 19-րդ դարի առաջին կեսի վերջերը, քանի դեռ Գամիրքում հիմնականում տիրում էր բնատնտեսությունը, քանի դեռ առևտրական հարաբերությունները գյուղում նվազ էին զարգացած: Այդ պայմաններում տնտեսության ամբողջ եկամուտը գտնվում էր տան մեծի լիիրավ կարգադրության տակ, որն իր այդ իրավասությունը մասամբ բաժանում էր իր կնոջ հետ: Հայրը, եթե տան ներկայացուցիչն էր հանդիսանում. հատկապես արտաքին աշխարհի հետ հարաբերություն ունենալիս, վարում էր դրամական գործերը և պատասխանատու էր ամբողջ տնտեսության կանոնավոր ընթացքի համար, ապա տնտեսության ներքին գործերը գտնվում էին տանտիկնոջ ղեկավարության ներքո: Բացի այդ, վերջինս շատ կարևոր և հաճախ էլ վճռական դեր էր կատարում հատկապես ընտա-

նիքի երիտասարդ տղաներին հարսնացուների գտնելու գործում: Այնուամենայնիվ, չպետք է ենթադրել, ինչպես անում են ոմանք, ընդհանրացնելով մասնակի դեպքերը, որ ընտանիքի մյուս անդամները, հատկապես կանայք ոչ մի իրավասություն չունեին և տնտեսության բացարձակ տերը տան մեծն էր համարվում և ոչ ոքի առաջ պատասխանատու չէր իր գործերի համար: Այստեղ ուզում ենք մեջբերել բազմաթիվ օրինակներից մեկը, որը լրիվ գաղափար է տալիս Գամիրքի հայ նահապետական ընտանիքում գոյություն ունեցող որոշ սովորություններին իրավունքի մասին: Կեմերեկում նահապետական մեծահարուստ ընտանիքներից մեկի ավագը՝ Ստեփան Էճմալյանը, առևտրով, գերդաստանի ուղտերի քարավանով Բրուսա քաղաքը գնալիս ծանոթանում է մի դեռատի կնոջ և նրանից ունենում է մի ապօրինի զավակ: Երբ այս եղբուկությունը նրա ծննդավայրում հայտնի է դառնում, մեծ աղմուկ է առաջանում Էճմալյանների օջախում: Գերդաստանի անվանը հասցված անպատվության համար ազգակից ընտանիքների մեծերի հավաքը Ստեփանին տեսն մաճրում է անում, այսինքն՝ պապենական ժառանգությունից զրկելով, վտարում է ոչ միայն ընտանիքից, այլև գյուղական համայնքից: Նրան տրամադրվում է գյուղից հեռու «Հորոխ» կոչված տեղում մի փոքր հողամաս, որտեղ նա իր երկրորդ կնոջ հետ ապրում է մինչև իր կյանքի վերջը⁵: Այսպիսի պարագաներում և, ընդհանրապես, ամուսնու մահից հետո, երեխաների անշահապաստության ժամանակ հայ կինը տան մեծի դեր էր կատարում: Եվ նույնիսկ տնտեսության ղեկավարման մեջ հայ կնոջ ցուցաբերած մեծ ընդունակության հետևանքով, տվյալ ընտանիքը կոչվում էր նրա անունով: Օրինակ, Մեհեշեմեֆ (Մանուշակենք), Բայրի-Գուճարեմեֆ, Մեհեմեմեֆ, Հալջոնեֆ Մաֆը. Էֆենդիի տունը. անվանակոչումները խոսում են այն մասին, որ այդ ընտանիքների ղեկավարները կանայք են եղել: Այս և տարբեր հանգամանքներից ելնելով, հիմք կա ենթադրելու, որ անցյալում հայ կնոջ կարծեցյալ ստրկությունը

³ Պատմող՝ Միքայել Զեքյան, 70 տարեկան, կոլտնտեսական, բնիկ չեփնիցի, այժմ բնակվում է Շահումյանի շրջկենտրոնում:

⁴ Սիմեոն Լեհացի, Ուղեգրություն, Վիեննա, «Հանդես ամսօրեայ», 1934, էջ 157—158:

⁵ Մարիամ Տոնապետյանի պատմածից (80 տարեկան, բնիկ կեմերեկցի):

ընտանիքում հիմնականում գոյություն չի բացել: Իսկ ինչ վերաբերում է նոր հարսների ժամանակավոր շնորհակալությանը. կամ ինչպես ասում են Արաբկիրում՝ մուճը կեցալուն, ինչպես նաև նախքան քնելը կեսրայրի, մեծ տագրերի ոտնամանները հանելուն, ոտքերը լվանալուն, հագուստները հանելիս օգնելուն և նույնիսկ կեսրայրի թիկունքը շփելուն, որ նա քնի, ապա այդ բոլորը, թերևս որպես հարգանքի նշան գալիս է դեռևս շատ մին ժամանակներում նոր հարսին՝ որպես ընտանիքի անդամ որդեգրելու մի հին ծիսական արարողությունից՝ շիլեից: Դա հավանաբար անհրաժեշտ ժամանակամիջոց էր ինչպես բոլոր նորնծաների, եռյնյան և նորահարսների համար, մինչև ծննդաբերությամբ նրա արյունակից անդամ դառնալը իր ամուսնու ընտանիքին: Հնի այդ վերապրուկը, եթե մեր օրերին վերացել էր քաղաքներում, ապա Գամիրքի առանձին շրջանների գյուղական վայրերում, ինչպես ասվեց, այն դեռևս պահպանվում էր որպես հարգանքի նշան: Նորահարսների շնորհակալությունը, կանանց առանձին ճաշելը, եթե գյուղական մեծ ընտանիքներում մինչև վերջերս դեռ պահպանվում էին, տպա քաղաքային փոքր արհեստավորական ընտանիքներում դրանք որոշ փոփոխությունների էին ենթարկվել: Օրինակ, դեռևս հարսնության առաջին օրից կեսրայրի և սկեսուրի կողմից թույլատրվում էր նորահարսին մուճը չպահել և միասին սեղան նստել: Համենայն դեպս, քաղաքամերձ գյուղերում ևս նախկինում եղած այդ խստությունը, առևտրական հարաբերությունների աշխուժացումից հետո որոշ փոփոխությունների էր ենթարկվել: Օրինակ, Սեբաստիայի շրջանի հայ գյուղերում, կանայք տղամարդկանց հետ միևնույն բաժնում էին նստում, ըստ տարիքային հասակի. և սեռերը ոչ-խառն: Երիտասարդ կանայք և աղջիկներ օդաներում տղաների խաղերին թեև չէին մասնակցում, բայց ընկերակցում էին նրանց երգերին:

Կապիտալիստական հարաբերությունների զարգացման հետևանքով, որոշ փոփոխություններ առաջացել էր նաև ընտանիքի ղեկավարման ձևի մեջ: Օրինակ, Գամիրքի հայկական ընտանիքում, հոր մահից հետո, կամ նրա ծերության ժամանակ, անհրաժեշտ չէր,

որ միշտ մեծ եղբայրը նշանակվեր տան ղեկավարը, այլ եղբայրներից ամենաճարտարը, խելացին, գրագետը, հասարակության հետ շփում ունեցողը, թեկուզ նա լիներ միջնակը կամ կրտսերը, որ ղեկավարում էր տնտեսությունը մոր հետ: Ինչպես տեսնում ենք, այս պայմաններում ավագությունը խոնարհվում է խելքի առաջ: Այդպիսի բազմաթիվ օրինակներից մեջքերենք թեկուզ մեկը: Կյուրիում Ճըղըլենց Մղդսի Կարապետը ուներ չորս որդի, որոնցից մեկը ամուսնացած և իրենից փոքրի հետ զբաղվում էր շալագործությամբ, միջնակը՝ Հակոբը, ջորիներով փոխադրական առևտուր էր անում, իսկ փոքրը դպրոց էր գնում: Մնողները և չորս եղբայրները ապրում էին միասին, բայց տնտեսության ղեկավարն էր միջնակ տղան՝ Հակոբը, իր մոր հետ: Այսպես, ուրեմն, տնտեսության ղեկավարման գործում արտաքին աշխարհի հետ հարաբերության համար, եթե միջնակն էր տան ղեկավարը, ապա տնտեսության ներքին գործերը գտնվում էր մոր իրավասության տակ: Եթե դա այդպես էր քաղաքատիպ մեծ ավանների արհեստագործական ավաններում, ապա գյուղական վայրերում հիմնականում երկրագործությամբ և օժանդակ անասնապահությամբ զբաղվող տնտեսությունների ղեկավարման գործում ևս տեղի էր ունեցել աշխատանքի բաժանում: Այսպես, Հալիսի ներքին հովտի Կեմերեկի շրջակա գյուղերից՝ Թեքմենում, Պարսամյանների մեծ ընտանիքը բաղկացած էր 25 մարդուց: Տան ղեկավարը, մեծ եղբայրը՝ Մարտիրոս անուն էր. եղբայրներից մեկը տնտեսության մեջ զբաղվում էր ոչխարների հոտի պահպանությամբ, գործերով, միջնակ եղբայրը՝ Վարդիվարը, մթերքների առևտրախոյվ և վաճառությամբ: Նրանցից յուրաքանչյուրը, տնտեսության՝ իրեն հանձնված ճյուղի թեև ազատ ղեկավարն էր հանդիսանում, սակայն ինչպես տնտեսության անհրաժեշտ իրերի, կենդանիների դնումը, նույնպես և

⁶ Թեքմեն գյուղում հարկահավաքի ժամանակ Պարսամյան ընտանիքի առևտրական գործերով զբաղվող Վարդիվարը, ինչպես ասվեց, զբաղվում էր վաճառությամբ. նա գյուղացիներին տալիս էր մի ժեշտիգին (քսան ղուրուշի միավոր) և կանխիկ առնում էր մեկ ղուրուշ տոնոս մեկ ամսվա համար:

ավելացած բրդերի, կաթնամթերքների, հացահատիկի և բանջարեղենի վաճառումը տեղի էր ունենում երեքի նախօրոք խորհրդակցությամբ: Այդպիսի մեծ տնտեսություններում, որոնք բաղկացած էին հաճախ կես վեցյակ զույգերից, գոյություն ունեւր ըստ սեռի և հասակի աշխատանքի բաժանում, բացի այն, որ կանանցից յուրաքանչյուրը, ըստ հասակի և փորձառության, կատարում էր իրեն բաժին ընկած աշխատանքը՝ հաց թխել, սնունդը պատրաստել, անասունները կթել, արտ քաղել և այլն, սակայն, իրենց հագուստեղենի պատրաստման գործում ներգերդաստանական փոքր ընտանիքի կիներ ինքն էր կատարում իր ամուսնու և երեխաների հագուստի՝ գուլպայի, շալվարի, մեջքի շալի (գոտու), դուլախի, գլխանոցի (րաշլըխ) և աբայի շալի գործելու, կտրելու աշխատանքները:

Բ. ՀԱՐՍԱՆԵԿԱՆ ԵՎ ԱՄՈՒՍՆԱԿԱՆ ՍՈՎՈՐՈՒԹՅՈՒՆՆԵՐ

Հարսանիքը պատմական Հայաստանի բոլոր գավառներում, այդ թվում և Գամիրքում, հասարակական կյանքի մեծ իրադարձություններից մեկն էր: Գա ամուսնության հետ կապված սովորույթների, արարողությունների և ուրախությունների մի կոմպլեքս է, որը թեև սոցիալ-տնտեսական նոր պայմաններին համընթաց նոր երանգավորում էր ստացել, այնուամենայնիվ, Գամիրքում մինչև համաշխարհային առաջին պատերազմը, հարսանիքի ավանդական սովորությունները, հիմնականում պահպանվում էին:

Գամիրք գավառի հայ ազգաբնակչությունը, ինչպես նշվեց, թեև միջնադարում պատմական Հայաստանի ներքին գավառներից էր գաղթել, ուստի և պահպանել էր հայրենի գավառների ավանդական սովորություններն ու հարսանեկան ծիսական արարողությունները, այսուհանդերձ, Գամիրքում տեղական նոր պայմանների և տարբեր ժողովուրդների հետ հարակցության ու կուլտուրական փոխազդեցության հետևանքով ավանդականը ստացել էր նոր երանգավորում: Գամիրքը որպես ազգագրական մի ուրույն շրջան, իր առանձնա-

հատկություններն ունենալով հանդերձ, ամբողջությամբ վերցրած ունեւր նաև մի ընդհանրություն:

Հարսանիքները ընդհանրապես տեղի էին ունենում աշնան վերջերին՝ բերքը ներս առնելուց հետո, դա միակ ազատ և հարմար ժամանակն էր մի այդպիսի շրջանի համար, որտեղ հիմնականում զբաղվում էին գյուղատնտեսությամբ: Մենք այստեղ քննության առարկա կդարձնենք ոչ միայն Գամիրքի հարսանեկան ընդհանուր սովորույթները, այլև ուշադրության կառնենք նույն գավառի տարբեր շրջանների առանձնահատկությունները, որոնք իրենց հերթին կօգնեն ընտանեկան հարաբերությունների պարզաբանմանը:

Մնողների համար, ինչպես հայտնի է, իրենց չափահաս զավակներին՝ ամուսնացնելը ոչ միայն բնական և լավ ցանկություն էր, այլև սոցիալ-տնտեսական մի անհրաժեշտություն, աշխատանքում թե ու թիկունք, նեցուկ ունենալու և պապենական օջախը անշեշ պահելու ձգտում: Այդ իսկ պատճառով չափահաս տղա զավակ ունեցող ծնողները, հատկապես նախօրոք իրենց մտքում քննության էին ենթարկում իրենց ապագա հարսնացուին: Այդ հարցի առաջնությունը վերաբերում էր տղայի մորը, որը ամուսնու հետ առանձին զրույցի նյութ էր դարձնում իրենց շրջանակում գտնվող չափահաս աղջիկների և նրանց ծնողների վարքն ու բարքը, առողջական վիճակը, դիրքը և հատկապես աղջկա մոր վարքը, որի մասին հետևյալ ասացվածքն էր ըստեղծվել՝ «Մորը նայիր՝ աղջիկը առ, եզրին նայիր՝ կտավը (բիազը) առ»¹: Այսուհանդերձ բացառված չէր նաև, որ չափահաս տղաներն իրենց հերթին երբեմն ընտրած լինեին իրենց ապագա հարսնացուն: Գամիրքի տարբեր շրջաններում այդ կատարվում էր տարբեր ձևով. օրինակ, Բինգյան գյուղի չափահաս տղաները շրջելով Եփ-

¹ Գամիրքի գյուղերում չափահաս էր հաշվում 18 տարեկան տղա զավակը, 15 տարեկան աղջիկը: Իսկ քաղաքներում՝ 18 տարեկան աղջիկը, 21—25 տարեկան տղան:

² Գամիրքում հատկապես Կեմերեկից-Կեսարիա ժողովրդական ասացվածքները թրքերեն էին լինում՝ «անասընա բագ գըզընը ալ, քենարընա բագ բեդի-նը ալ»:

րատի ակերի աղբյուրների մոտերքը, աչ-
քից հեռու, այդ վայրում հանդիպում էին
իրենց հավանած աղջկան, որը սահորով
ջրի էր գալիս: Տղան առանց որևէ բառի,
նրա ոտքերի առաջ մի կարմիր խնձոր էր
դնում: Այդ սովորությամբ իր արտահայ-
տությունն է գտել նույնիսկ ժողովրդական
բանահյուսության մեջ:

Խնձոր մ'ունիմ խաձած է,
խաձած տեղն արծթած է,
էղբերս ուղեց չավի՝
էս իմ յարիս տվածն է՝:

Ծնողները նախօրոք կատարելով իրենց
ընտրությունը կամ հավանելով իրենց տղա-
յի ընտրածին, ծանոթների կամ բարեկամ-
ների միջոցով զգուշությամբ աղջկա ծնող-
ների մտադրությունը իմանալուց հետո,
աղջիկտեսի էին գնում, որը Գամիրքում,
ըստ գյուղի, քաղաքի և յուրաքանչյուր շրջ-
անի կուտուր-կենցաղային պայմանների,
տարբեր ձև ուներ: Օրինակ, Ակնում տղայի
ծնողները տաներեց քահանայի գլխավո-
րությամբ՝ իրենց մոտիկ բարեկամներից,
աղջկա ծնողքի մոտ խնամախոսության էին
ուղարկում, առաջին համաձայնությունը
կոչվում էր խաբկալալ: Կեսարիայում գոյու-
թյուն ուներ տարբեր սովորություն: Տղայի
ծնողները իրենց ծանոթի կամ բարեկամի
գլխավորությամբ, որին ընկերանում էր նաև
ապագա փեսացուն, գնում էին աղջիկտեսի:
Պետք է նշել, որ շափահաս աղջիկ ունե-
ցողները, ըստ տեղական սովորությի, գի-
տեին, որ երկուշաբթի և երեքշաբթի օրերը
աղջիկտեսի են գալիս, ուստի և այդ օրերին
իրենց տները սովորականից ավելի մաքուր
և դասավորած էին պահում: Այցելուների
կողմից թեև նշանախոսության մասին խոսք
չէր լինում, բայց աղջկա կողմի տենցիները
այդ անկասկածալ այցելության իսկական
նպատակը կռահում էին անմիջապես⁹:

Այցելուների առաջնորդը, ըստ սովորու-
թյան, խմելու համար ջուր էր խնդրում:
Ինչպես հայտնի է, ջուր հրամցնողը ընդ-
հանրապես տան շափահաս աղջիկն էր լի-
նում, ուստի և աղջիկը ջուրը բերելով խո-

նարհությամբ հրամցնում էր խնդրողին և
ձեռները կրծքին ակնածանքով սպասում էր
մինչև խնդրարկուի ջուր խմել վերջացնելը,
ապա ջրի բաժակը վերցնելով, ետ էր քաշ-
վում և մի քանի վայրկյան կանգնած բառե-
քոնում: Դա առիթ էր տալիս այցելուներին
աղջկան մոտիկից դիտելու: Տան մեծի նշանի
վրա, երբ աղջիկն արդեն քաշվում էր ներք-
նասենյակը, այցելուներն էլ իրենց հերթին
մեկնում էին: Տղան, եթե հավանության էր
արժանանում, իսկ աղջիկն էլ իր հերթին
հավանություն էր գտնում տղայի կողմից,
աղջկա կողմը ընդհանրապես լուռ էր մը-
նում և սպասում, որ տղան իր քրոջ կամ
հարսի միջոցով լուր ուղարկի աղջկան, որ
համակրում է նրան¹¹: Իսկ աղջկա ծնողնե-
րը, եթե չէին հավանում տղային, ապա հե-
տևյալ օրը իմաց էր տրվում, որ աղջիկտե-
սի չգան:

Տղայի կողմի կանայք աղջկա ծնողնե-
րի կողմից նախապես որոշված օրը, գնում
էին պաշտոնական աղջիկտեսի: Այդ կա-
նաց կարծիքը հաճախ վճռական դեր էր
խաղում՝ աղջկա ձեռքը խնդրելու կամ
չխնդրելու գործում:

Այդ երկու նախապատրաստական այցե-
լություններից հետո, որոնք ընդհանրապես
տեղի էին ունենում առանց փոխադարձ մե-
ծարանքի, տղայի ծնողների կողմից ու-
ղարկվում էին մոտիկ բարեկամներ՝ աղջկա
ձեռքը պաշտոնապես խնդրելու համար,
դրանք կոչվում էին ռիճաչիճեռ, այսինքն՝
խնդրարկուներ:

Խնդրարկուների առաջնորդը, որ սովո-
րաբար հեղինակավոր մեկն էր լինում, իսկ
Ակնում՝ տաներեց քահանան, խոսք առնե-
լով, ասում էր. «Եկած ենք աստծո հրամա-
նով, հայրապետի կանոնով, ձեր աղջկան
(անունը տալով) ձեռքը խնդրելու մեր (օրի-
նակ՝ Աճեմենց Կիրակոս աղայի) տղին»:

Աղջկա ծնողներից հայրը սկսում էր ան-
վերջ առարկություններ՝ «Թե պատրաստ
չեն», «Թե այդ մասին խորհելու համար
ժամանակ է հարկավոր» և այլն և այլն:
Այսպես, զանազան պատրվակներից հետո
կողմերը խորհելու համար ժամանակ էին
պահանջում: Պահանջված ժամանակամիջո-
ցը ընդհանրապես երկար էր լինում, բայց
երկուստեք համաձայնությամբ ղեղջվում էր

⁹ Մինաս և Մառի Մինասյանների հաղորդումից:

¹⁰ Մ. Պալյան, Ամուսնական սովորությունները
Կեսարիո մեջ, «Բիւրակն», Կ, Պոլիս, 1900, էջ
344—347:

¹¹ Նույն տեղում:

11—21 օրվա: Որոշված ժամանակից մի օր առաջ տղայի կողմից աղջկա ծնողներին լուր էր ուղարկվում, որ վաղը զալու են խոսքի: Երբ աղջկա հայրը սովորաբար պատասխանում էր՝ «Թող հրամանեն» կամ «այսօր պատրաստ չենք, թող այս ինչ օրը հրամանեն»: Նախքան տղայի կողմից պաշտոնական ձևով խնդրելը, որոշված օրը տղայի հայրը իր մոտիկ ազգականներով գնում էր աղջկա հորից պաշտոնապես նրա դստեր ձեռքը խնդրելու: Այստեղ պետք է նշել այն, որ նախքան տղայի կողմից պաշտոնական ձևով խնդրելը, փոխադարձ զգուշությունները, ձգձգումները ունեն իրենց արդարացի պատճառները: Այդ ձգձգումների նպատակն էր ոչ միայն իրար ավելի լավ ճանաչելը, այլև որովհետև մի անգամ արդեն մերժված տղան կամ հավանություն չգտած աղջիկը, ըստ տիրող հասարակական կարծիքի, ամուսնության համար հետագայում որոշ դժվարությունների էր հանդիպում: Հակառակ կանխավ գոյացած համաձայնության, այս անգամ ևս ըստ սովորության աղջկա ծնողների կողմից զանազան դժվարություններ էին հարուցվում, պահանջվում էր նոր պայմանաժամ: Բազմաթիվ անտեղի առարկություններից հետո միայն, վերջապես, ստվում էր ավանդական այժ-ն:

Առաջին խոսք առնողը ծնկի գալով ասում էր «Հայր մեր»-ը և երեսը խաշակընդում, նույնն էր անում նաև աղջկա հայրը, որից հետո սկսվում էին երկուստեք բարեմաղթությունները, աչքերնիդ, աչքերնիս լուս, խնամի, տաճառը ձեռ գավակների զլխին:

Աղջիկը, որ խոսակցության ամբողջ տեղողության ժամանակ բացակայում էր, իր մեծ քրոջ կամ եղբոր կնոջ ուղեկցությամբ ներքնասենյակից ներս էր գալիս՝ խնամիների ձեռքը համբուրելու համար: Իսկ փեսացուն, որ խոսքի պաշտոնական բացակա էր լինում, կանչվում էր: Խնջույքը ըսկըսվում էր («Երբան անուշության» համար) շերտերով և տևում էր 3—4 ժամ, այսինքն՝ մինչև ուշ գիշեր¹²:

¹² Գամիթի գլուխը ընդհանրապես գործ էին թծվում դժու-զուհեմ, սրինգ, իսկ քաղաքային վայրերում՝ քեմանչի, ուտ, սազ, գրանիթա, վերջերս՝ նաև ջութակ:

Խոսքի պաշտոնական հանգամանք ստանալը, կարգը այնպես էր պահանջում, որ մի օր հետո տաներեց քահանան նոր խնամիների տները գնալով, աղջկա և տղայի գլխին ավանդական «պահպանիչ» պետք է կարդար:

Խոսքի պաշտոնական մեկ շաբաթ կամ, գլուխկան որոշ վայրերում, մինչև վեց ամիս հետո, տեղի էր ունենում նշանդրեքը կամ, ինչպես անում էին Ակնում՝ մեծ նշանդրեք: Որոշված օրը տղայի ծնողները, փեսացուն և իրենց մոտիկ ու հեռավոր ազգականները, հարսնացուի ծնողները և նրանց մոտիկ բարեկամները հավաքվում էին աղջկա տանը, որտեղ յուրաքանչյուր սեռ նստում էր առանձին, երկուստեք բարեմաղթություններից, կերուխումից հետո, կես գիշերի մոտերը, փեսացուի հայրը փափագ էր հայտնում, որ իր հարսնացուն ձեռք համբուրելու ներկայացվի: Աղջկա հոր կողմից, ըստ սովորության, եղած մի քանի ձևական պատճառաբանությունից հետո հարսնացուն մի մոտիկ ազգականուհու առաջնորդությամբ, ներքնասենյակից ներս բերվելով, համբուրում էր կարգով բոլորի աջ ձեռքը, նույնիսկ իր նշանածի ձեռքը, որից հետո ականածանքով հո-հո գնալով, ձեռները կրծքին՝ բարեկ էր կենում: Խմում էին նշանվածների կենացը և նրանց գովքն էին հյուսում:

Հարսնացուն նախքան ներքնասենյակ վերադառնալը, որպես հարգանք վերստին համբուրում էր ներկաների ձեռքը, որի ընթացքում, հատկապես կեսարիայում յուրաքանչյուրը տալիս էր հարսնացուին նվեր, ինչպես ասում էին՝ երես տեսնուկը: Նվերները ընդհանրապես բաղկանում էին զարդոսկիներից՝ զրամիցա, մանմուղի, դրա կամ դագի, սանտիլը և տասնոց (օնուկ) ոսկի: Հարսնացուն նվերները մատների միջև այնպիսի մի կարգով էր շարում, որ հեշտությամբ հասկացվում էր, թե ով ինչ նվեր է տվել: Մի քիչ հետո աղջկա մայրը իր պարագաներով, քաշվում էր մյուս սենյակը փեսային նվեր մատուցելու համար¹³, փե-

¹³ Փեսատեղը Գամիթի բոլոր շրջաններում նույն ձևով չէր կատարվում, օրինակ՝ Էվերեկում աղջկա մայրը մի քանի ծանոթ բարեկամ կանանց հետ գնում էր փեսատեղի և որպես նվեր տանում էր մի մետաղյա թաշկինակ, ակով մատանի, ինչպես նաև մի պնակ մեղր, վրան սեր՝ Երբան քաղցրացնելու համար:

ևացուին ներս կանչելով, տալիս էին, ըստ իրենց նյութական կարողութեան, աղաման-դակուռ կամ հասարակ ակով ոսկի մատանի, ծխախոտի արծաթյա տուփ, սաթե համրիչ, ծխամորճ, ուլունքով գործված ժամացույցի աման, մետաքսե մի թաշկինակ և այլն:

Նշանտուքի խրախճանքները կամ ինչպես ասում էին Ակնում՝ խալվաթին, ընդհանրապես տեղում էր ամբողջ գիշերը, խնամախոսները առավոտյան դեմ ցրվում էին ճաստված սուրբ պսակին արժանացնե՞ա բարեմաղթություններով:

Նշանդրեքի փաստը, ըստ ընդունված կարգի, պետք էր բոլորին հայտնի լիներ: Ուստի և տղան ու աղջիկը նշանդրեքի հետեյալ օրից իսկ զարդարվում էին իրենց ստացված նվերներով: Հարսնացուն, ըստ տեղական ճաշակի, իր զարդուսկիները դասավորում էր կարմիր ծոպավոր ֆեսի առջևի կողմում եռանկյունաձև. կամ զարդարում էր առախշին (թասակ) և որպես մանյակ կախում էր կրծքից, կամ որպես շարոց ծամերի խսիրի վրա և կամ ծամերի հյուսկենների ծայրերին, երբեմն նաև վզին ու ծամերին միաժամանակ: Իսկ փեսացուն իր միջնամատին կրում էր ակով մատանին: Այդ զարդերի քանակը կարող էր բազմանալ մինչև ամուսնության օրը, նոր տարվա, ծննդյան, բարեկենդանի, զատկի և այլ տոների առթիվ տրված նվերներով¹⁴:

Ինչ վերաբերում է նշանդրեքից հարսանիքի միջև ընկած տևողությանը և այդ ժամանակամիջոցում նշանվածների տեսակցության ձևերին՝ դրանք առաջին հերթին իրարից տարբերվում էին ըստ գյուղի և քաղաքի կուտուր-կենցաղային պայմաններին և տեղական սովորություններին, ինչպես նաև ենթակաների ընտանեկան դրությանը: Օրինակ, եթե գյուղերում նշանդրեքից ամուսնության միջև ընկած ժամանակամիջոցը տեղում էր 6 ամսից մինչև մեկ տարի, ապա քաղաքներում նշանախոսությունից հարսանիք՝ երբեմն նույնիսկ մի քանի շաբաթ միայն: Այդ ժամանակամիջոցը գյուղական վայրերում երկար էր տե-

վում, առաջին, նրա համար, որ ամուսնի դաշտային աշխատանքներն ավարտվեն և նոր միայն ամուսնության պատրաստություններ տեսնեն, հարսանիքի ուշացումը նշանվածների համար իրար վայելելու մի միջոց էր, քանի որ գյուղական երիտասարդությունը օրինականացած այն ազատությունը չունեի, ինչ որ վայելում էր քաղաքներ: Գամիքի քաղաքային վայրերում, հատկապես Ակնում, Արաբկիրում, Սեբաստիայում, ըստ տեղական սովորության, նշանված տղան, ամեն շաբաթ երեկո և տոնական առիթներով այցելության էր գնում. մի քանի ծանոթ ընկերներով իր նշանածին, ուր մտերմական մի շրջանակի մեջ արժանանում էր ջերմ հյուրասիրության: Համեստության ու պատշաճության սահմաններում հրապուրվում իր նշանածի հետ¹⁵: Գալով գյուղացի երիտասարդին, թեև նույնպես առիթը չէր պակասում այգի, արտ, կալ և աղբյուր գնալ-վերադառնալու ժամանակ. իր նշանածի հետ սիրավիթ խոսքեր փոխանակել և կամ երեկոյան մթնելուն աղջկա մոր կամ տան մեծ հարսի կարգադրությամբ ընտանիքի մյուս անդամներից գաղտնագողի իր նշանածի մոտը երթալ, սակայն, ընկերական շրջանակում, իր նշանածի հետ հրապարակով տեսակցությունը հատկապես տեղի էր ունենում երկաճ քաղաքում ժամանակ: Ինչպես հայտնի է, Գամիքի, հատկապես գյուղական վայրերի կենցաղում ընդհանրացած երեկոյթ էր աշնան առտնին որոշ աշխատանքների, այդ թվում և ձավար աղալու փոխօգնությամբ (մեջի) կատարումը: Ուստի և երկանքով ձավար աղալու համար կանչվում էին դրացի, բարեկամ-ազգականի նշանված աղջիկները, իսկ վերջիններս ամեն ջանք թափում էին, որ իրենց ծնողները չմերժեն այդ հրավերը, մյուս կողմից գաղտնի լուր ուղարկելով իրենց նշանածներին, որ իրենք երկաճ քաղաքում են հրավիրված այսինչ գիշեր, իրենց այնինչ ազգականի տունը: Երիտասարդները գիշերը գնում, բարձրանում էին այդ տան կտուրի վրա: Երկանքը սովորաբար տեղավորված էր լինում թոնրաթմբի այն մասում, որը գտնվում էր երդիկի ճիշտ ներքևը: Այսպիսով, հաղորդակցու-

¹⁴ Տ. Պալյան, Ամուսնական սովորությունները Կեսարիո մեջ, «Բիւրակն», Կ. Պոլիս, 1900, էջ 344—347:

¹⁵ Ա. Քեչյան, Ակն և Ակնցիք, Փարիզ, էջ 258:

թյունը հեշտանում էր: Անմիջապես, որ ոտ-
քի ձայն էր լսվում կտուրից, գեղեցիկ ձայն
ունեցող աղջիկները փոխնիփոխ սկսում էին
մենեքեզ, հատկապես «Երկանքի մանին»,
իսկ խումբը նրան պատասխանում էր.

Երկանքը մանի, մանի
Օրիմ ո քունդ տանի.
Իս ինչ ըսիմ էն յարին
Զգար իս քովը տանի.
Երդիկը ելլելս կուգա,
Դարվար նայելս կուգա,
Եկավ անցավ շան տղան,
Ղատան առնելս կուգա:

Խումբը՝

Դարձրեք աղջըներ, դարձրեք
կուս-յարը մեզ ղրկեցեք,
Զի դառնում, չի դառնում
կուս-յարը տանիքից չիջնում:
(կրկնությունը թրքերեն)

Տանիքում սպասող երիտասարդներից
յուրաքանչյուրը ճանաչելով իր նշանածի
ձայնը, չվանով իջեցնում էր մրգեղենով լե-
ցուն կարմիր մահրման (մեծ թաշկինակ):
Խինդը, ծիծաղը վերևից ներքև համակում
էր բոլորին, այսպես, յուրաքանչյուրը սպա-
սում էր իր նշանածի ձայնին:

Երկանք քաշող աղջիկները իրենց հոգե-
կան հույզերը արտահայտում էին նաև Ըլլա-
յի, Ըլլայի կարոտի, պանդխտի երգերով,
որոնք լայն տարածում էին գտել, հատկապես
20-րդ դարի սկզբներին՝ գյուղի շերտավոր-
ման խորացման հետևանքով, երբ երիտա-
սարդները տարիներով օտար երկրներ աշ-
խատանք փնտրելու էին գնում:

Ըլլայի, Ըլլայի

Պեղերկան Ըլլայի բեռդ բանայի,
Սըվըրճըխ Ըլլայի վրադ դառնայի,
Լեզուս բալլինք Ըլլար սիրտդ բանայի:

Ըլլայի, Ըլլայի

Թավսիրճի Ըլլայի, Թավսիրդ հանեի,
Ամեն կարոտնալուս առջևս առնեի,
Վարդի ծառ Ըլլայի, դուռդ բուսնեի,
Ամեն առավոտին սրտիդ բացվեի:
Դալղա, դալղա կուգա Պուխի ծովը,
Ինչ անուշ կփչե սեվտային հովը,
Տերը նասիպ ըներ, երթայի քովը,
Առնեի մուրատս, ընկնեի ծովը:

Մինչև այդ տան տնտեսուհին, սեղանը
պատրաստած, երիտասարդներին հրավի-
րում էր ճաշի: Նրանք տանիքից վար իջնե-
լով, սեղան էին նստում: Դա միակ առիթն
էր նշանվածների համար, հատկապես Հա-
լիսի ներքին հովտում, մտերմական յու-
րահատուկ մի շրջանակում իրար հետ տե-
սակցել կարողանալու համար: Բացի այդ,
գյուղական վայրերում, ըստ տեղական սո-
վորության, տղայի ծնողներն իրենց մոտիկ
ազգականներով հարսնացուին տեսակցու-
թյան էին գնում, որը Կեմերեկի շրջանի հայ
գյուղերում տեղեկ (հավաքույթ, հարսա-
նիք) էր կոչվում: Որոշված օրից մի երկու
օր առաջ տղայի կողմի բարեկամները ու-
ղարկում էին անպայման մի տապակ փախ-
լավա և վրան անգույց քվով զաքաներ, իսկ
խրախճանքի օրը հարսնացուին տալիս էին
նաև երեստեսնուկի դրամական նվերը:
Ըստ սովորության, հարսնատեսի էին գնում
նաև տղայի քույրերը՝ 40 մանկանց տոնին
(40 ճրագալույցին), հարսնացուի հետ ըզ-
բոսնելու համար:

Հայկական գավառներում, ընդ որում և
Գամիթքում, ինչպես ասվեց, հարսանիքը
լինում էր աշնան վերջերին: Հարսանեկան
նախապատրաստման աշխատանքները ընդ-
հանրապես սկսվում էին ամուսնական ծե-
սից առնվազն երկու շաբաթ առաջ, որը
Կեմերեկից դեպի Կեսարիա ընկած հայ
գյուղերում կոչվում էր Բեսի-Բիշի (կտրում-
ձևում) կամ պազաբլիս կըյել, մինչդեռ Հա-
լիսի վերին հովտում, Սեբաստիայի շրջա-
նում՝ խոսք կտրել:

Խոսքկտրումի համաձայնությունը, ըստ
սովորության իրավունքի, տեղի էր ունե-
նում երկու կողմի հայրերի, ինչպես նաև
նրանց մոտակա տարեց ազգականների մի-
ջև: Նրանք համաձայնության էին գալիս
հարսանիքի ժամկետի, հարսնացուի հա-
գուստների ու զարդերի քանակի ու որակի,
տղայի կողմից նշանակվելիք կնքահոր¹⁶
(քավոր), ինչպես նաև հարսանեկան այլ
հարցերի մասին: Երբեմն պատահում էր,
որ խոսքկտրումի ժամանակ ծագած ան-
համաձայնության հետևանքով նշանախո-

¹⁶ Քավորը (կնքահայրը) ոչ միայն հարսանի-
քում, այլև նույն ընտանիքի մեջ հետազայում ևս
ունեի իր հեղինակավոր խոսքը՝ երեխաների մկրտու-
թյան, մահվան, ինչպես և բաժանման ժամանակ:

սովորելը խզվում էր, սակայն, եթե չկային լուրջ պատճառներ, ընդհանուր առմամբ խորհրդակցությունը համաձայնությամբ էր վերջանում: Այսուհանդերձ, պետք է նշել, որ ամուսնական սակարկությունը հայերի մեջ դեռ շատ վաղուց կորցնելով առ ու ծախի իր սկզբնական բնույթը, պահպանվում էր նվիրատվության ձևով: Ուստի և դիսպոզիոն՝ որպես նշանվելիք աղջկա փոխարժեք, հայերի կենցաղում վերանալով, պահվում էր միայն աղջկան, նրա մորը և եղբորը տրված նվերների ձևով¹⁷:

Հարսանիքի անհրաժեշտ գնումների կատարումից և անհրաժեշտ ճշմարիտ ճացի (սաջի հաց) մեծ կաթսայով շամիչե խաշմի պատրաստումից հետո միայն սկսվում էր հարսանիքի ծանուցումը: Մինչ փեսացուի մոտիկ ընկերները: հարսանիքի տան կտուրից դուրս գալուց հետո ծանուցում էին, որ հարսանիքը սկսված է, մյուս կողմից՝ տղայի տնից ուրբաթ առավոտից սկսած գնում էին ազգականների տները, որը առն անել էր կոչվում: Ըստ սովորության, առաջինը ձեռնում էին հարսնացուի տունը, ինչպես նաև երկու կողմի ազգական հարսնացուներին և թագվորցիներին: Տուն ձեռնելու համար որպես նվեր հարսնացուի տունը տարվում էր մի ձեռք յուխա և մի փառիաճ խաշապ, մի գաթա, իսկ այգեգործական շրջաններում՝ խնձոր և ուրիշ մրգեր:

Հրավիրյալները սկսում էին գալ շաբաթ երեկոյան, և համաձայն իրենց հասակին, սեռին ու դիրքին, պատշաճորեն ընդունվում էին տղայի հոր, փեսայի և կամ տանտիկնոջ կողմից՝ տարեց այր մարդիկ մեծ օդայում, երիտասարդ տղամարդիկ փեսայի օղայում, կանայք մեծ տան քուրսու մոտ, իսկ հարս-աղջիկները՝ սաքուի առաջ դուրս գալուց հետո:

Փեսա-ընկերների առաջին գործն էր լինում նշանակել մակարապաշին կամ իգիտբաշին, որը Կեմերեկից Կեսարիա կոչվում էր մոմենի: Երիտասարդներից ամենահարգվածը, ձեռնին մի հովվական գավազան, ըն-

կերներով բարձրանում էր հարսանիքի տան կտուրը կամ, տեղի անհարմարության պարագայում, հավաքվում էին տան առաջ մի բաց տեղում: Երիտասարդների առաջնորդը խոսք առնելով, ասում էր. Ընտրեմք մեր թագավորի պաշտպան մոմենի: Եվ սկսվում էր աճուրդը. ինձմե տասը լիդրե շաբապ, մի ուրիշը՝ ինձմե տասը լիդրե շաբապ և գառ մը, ինձմե թախլու մը և կես թենեֆե ըրախի. այսպես նրանցից ամենաշատ մատուցողը, ամենաառատաձեռնը ընտրվում էր մոմենի¹⁸:

Մոմենի առաջին գործն էր լինում իր հետևորդներով գնալ տղայի քեռու տունը, փեսային «թագավորական հալավը» հագցնելու, իսկ քավորիկներ, իր հերթին, մի խումբ հարս-աղջիկներով գնում էր աղջկա տունը՝ հարսնացուին լողացնելու:

¹⁸ Գամիրքում մոմենի (խաշեղբայր), ընթացապ տերմինների գործածությունը որոշ շփոթությունների տեղիք էր տվել, Օրինակ, Հալիսի վերին հովտի հայ գյուղերում հարսին որպես պաշտպան նշանակելու հին սովորության վերանալու հետևանքով, մոմենի-ն շփոթվում էր փեսամանտիկի (սաղտոճ) հետ, իսկ Հալիսի միջին հոսանքում՝ Կեմերեկից դեպի Կեսարիա, կնքահոր (քավոր), մոմենի (խաշեղբոր) ներկայությամբ, հարսնեղբոր գերը՝ որպես հարսի պաշտպան, ավելորդ նկատելով, վերածվել էր լոկ մի ծխական սովորության: Օրինակ, 8—12 տարեկան տղա, ընդհանրապես քավորի մանչ երեխան, հազվադեպ դեպքում միայն աղջիկ, փեսամանտիկ (սաղտոճ) էր կարգվում: Հասկանալի է, հարսի առաջին ծնունդը՝ էռնինկը տղա լինելու համար նախապատվությունը միշտ տրվում էր մանչերին:

Ինչպես հայտնի է, Արեւելյան Հայաստանի գավառներում կնքահայրը կոչվում է քավոր, մինչդեռ Գամիրքում ընդհանրացված էին ընթացապ (կնքապապ) և կնքաճայր տերմինները: Մակարբաշին Արեւելյան Հայաստանի մեծ մասում կոչվում է խաշեղբայր կամ թագավորցի, իսկ Արեւմտյան Հայաստանում՝ մոմենի ազգաբաշի, իգիտբաշի: Պետք է ենթադրել, որ տերմինների այս տարբերությունը հետևանք է հոգևոր կուլտուրայի փոխազդեցությունների: Օրինակ, քրիստոնեական եկեղեցու ազդեցության տակ իգիտբաշին, մակարբաշին կամ ազապրաշին, որ նախկինում հարս ու փեսան առևանգումից պաշտպանելու դեր ունեին, դարձել է խաշեղբայր կամ մոմենի: Մակարբաշին, երբ հարսի ու փեսայի փոխարեն պսակի ժամանակ խաշ էր բռնում, ապա Գամիրքի որոշ վայրերում խաշի փոխարեն մոմ էր բռնում, ուստի և առաջացել էին խաշեղբայր, մոմենի տերմինները: Թագավորցի տերմինը փոխաբերական իմաստ ունի: Ըստ Աստվածաշնչի, եթե փեսան թագավոր է, սպա փեսայի ընկեր-պաշտպան ամուրի երիտասարդը՝ թագավորցի (թագավորացու է), այսինքն՝ նա էլ մի օր թագավոր է լինելու:

¹⁷ Տղայի կողմից հարսնացուին տրվում էր մի դաւանի էնթարի, մի ասեղնաբանված օալթա, մի աճնմ շալը, օգ, մատանի կն, մորը՝ մի թոփ թիւն, որը կոչվում էր Ենթալթի. իսկ եղբորը՝ մի զույգ ոտնաման, որպես գաւառաշ-յալը:

Նախքան պսակի խորհուրդը, փեսան պարտավոր էր լոգանք առնել, սափրվել, մարմնով մաքրվել: Նույն մաքրությունը պահանջվում էր նաև հարսնացուից: Փեսայի լոգանքի, սափրվելու ժամանակ կատարվում էին որոշակի արարողություններ. և այդ ծեսի ու հարսնացուի «հալավ օրհնեքի» և «հալավ հագցնելու» սովորությունը ինչպես հայկական մյուս գավառներում, նույնպես և Գամիրքի հայերի կենցաղում արմատացած երևույթ էր: Այսպես, փեսան լոգանքից հետո, իր ներքնահագուստը և էնթարին հագած, առաջնորդվում էր այն սենյակը, ուր քահանան պետք է օրհներ թագավորական հալավը: Քահանան օրհնում էր փեսայի սալթան (հերմանեն), գըլխարկը և քավորի սուրը, որոշ վայրերում միաժամանակ նաև հարսի հալավը: Ինչպես փեսայի հինադրեքի, նույնպես և հալավ հագցնելու ժամանակ տեղի էր ունենում աճուրդանման մրցում: Ամենաշատ փող նվիրողը արժանանում էր փեսա հագցնողի պատվին: Ըստ ավանդական սովորության, փեսա հագցնողը հալավի յուրաքանչյուր կտորը նախքան հագցնելը երեք անգամ փեսայի գլխի վերև շուրջանակի դարձնում էր (այստեղ ակներև է փեսայի համար աստվածային երրորդության գործության հայցումը), որին փեսաները բուրդը միաբերան երեք անգամ թագավոր շնորհավոր էին կոչում: Այնուամենայնիվ, յուրաքանչյուր շրջան ուներ բարեմադրությունների և երգերի տարրեր փոփոխականեր: Օրինակ, Հալիս գետի վերին հովտի հայկական գյուղերում՝ պոճոռ, պոճոռ¹⁹ էին կանչում և շնորհավորում էին, թագավոր վաճառք շահի ասելով: Իսկ վերին Ծփրատի շրջանում, հատկապես Ակնում, երեք անգամ աստված շնորհավոր ընեն բացազանչելով, երգում էին հետևյալը.

«Ահա բարձր լեռներն ի վար,
Մեզի բարակ արև մըն է ծաթեր
Ամենուն երդիկն ի վար,
Մեզի դուռն ի ներս է ճառագեր,

¹⁹ Սերաստիայի շրջակա գյուղերից Խորսանայում «բոճոռ» էին կանչում, իսկ Կովստան գյուղում՝ վաճառ: Տե՛ս Վ. Համբարձումյան, Գյուղաշխարհ, Փարիզ, 1927:

Ամենդ ի վար եկեք,
Թագավորին կապան կապեցեք,
Լուսնկան աստառ արեք,
Արեգակն երես ձևեցեք,
Ան մոյ ու խոշոր աստղեր,
Թեևրուն տյուկմե կապեցեք²⁰:

Ակնում տեղական սովորության համաձայն, երբ տղայի հայրը իր որդու՝ փեսայի գլխին թագ (ծոպավոր ֆես) էր դնում, այդ վայրկյանից միայն նա թագավոր էր համարվում:

Փեսայի թագավորական հալավին հաջորդում էր պարերով ուղեկցվող խրախճանքն ու կերուխումը: Փեսան և փեսաներները, ազապաշիի (մոմճիի) գլխավորությամբ, ընդհանրապես «Հողալո ջան» երգելով պարում էին հալալը՝ կտր պարը:

Հողալո ջան, հողալո,
Կողբեր շիրին, մարալո ջան, մարալո,
Հով, հով, հով լինի,
Ցարս քեմարով լինի,
Ցարիս տունը ծով լինի,
Դե զանենք, զանենք թողը հանենք,
Չար դուշմանին կողը հանենք:

Փեսա հագցնելու արարողությանը հաջորդում էր հացկերույթը, տեղական բարբառով՝ հաց թափել-ը, որի ավարտին քեռին կամ քավորը, որ փեսա հագցնողի դերում է գտնվել, ըստ սովորության, փեսային որպես նվեր, տալիս էր գոմշի ձագ կամ մի հորթ, ու կամ զառ:

Խումբը դհուլ-գուռնայի նվագակցությամբ. դեպի փեսայի տունն ուղևորվելիս, ճանապարհին անպայման պետք է անցներ հարսնացուի տան առջևից և փեսաներները բռնո՞ւ կամ ըստ տեղի սովորության վաճա՞ն, վաճա՞ն²¹ ուրախ բացականչություններով հասնում էին փեսայենց տունը: Այստեղ հարսանեկան խրախճանքը շարունակվում էր մինչև ուշ երեկո:

Փեսային հագցնելու արարողությանը համընթաց աղջկա տանը տեղի էր ունենում նաև հարսնացուն հագցնելու և հնադրեքի արարողությունը: Վերոհիշյալ արարողու-

²⁰ Ա. Քեյլան, Ակն և Ակնցիք, Փարիզ, 1952, էջ 259:

²¹ Պոճոռը վաճառի աղավաղված ձևն է՝ Վ. Բ.:

խոնարհների համար, թեև Գամիրբի բոլոր շրջաններում մի ընդհանրություն գոյություն ունի, սակայն յուրաքանչյուր շրջան ունի իր տեղական առանձնահատկությունները: Օրինակ, Հալիսի վերին հովտում, Սեբաստիայի շրջակա հայ գյուղերում, ինչպես ասվեց, երբ մակարաշին կամ մոմենին դնում էր Եփեսոսի հագցնելու, մյուս կողմից ընձեմեբը (քավորկին), մի խումբ հարս ու աղջիկներով, իր հերթին գնում էր հարսնացուին հագցնելու:

Հարսնեկները (յենկե) դհուլ-դուռնայի նվագակցությամբ, թափորի առջևից գնում էր մի պատանի, ավանդական խոնարհ²² երկու ձեռքերով գլխից վեր բռնած: Խոնարհը, ճանապարհին երգելով և մեջընդմեջ ղալա-նի ճե՛յ կանչելով, առաջանում էր դեպի աղջկա տունը:

Հարսնետան դռան առաջ երկու հարսնաքույրեր հարսնեկներին բաբի եկաֆ մաղթելով, ներս էին հրամցնում, որին քավորկինը պատասխանում էր՝ աչքերնիդ, աչքերնիս լուս:

Ի պատիվ հարսնեկների, հարսնաքույրերը ձեռքերին մեկ-մեկ կարմիր թաշկինակ, թեմնուկ, դհուլ-դուռնայի նվագակցությամբ պարում էին և քամզաբա երգում:

Լե, Լե, Լե, Լե, թամզարա,
Լե, Լե, Լե, Լե, թամզարա,
Աղջիկ դուռն ինձ յար կըլնե՞ս,
Դարգերուս դարման կըլնե՞ս.
Լե, Լե, Լե, Լե, թամզարա (կրկնել)
Ելնենք երթանք թամզարա,
Ինչ որ կուզես հաղը կա,
Լե, Լե, Լե, Լե, թամզարա (կրկ.)
Աղջիկ մազերդ թուխ է,
էս ինչ բարութի մուխ է.
Լե, Լե, Լե, Լե, թամզարա (կրկ.)
Մուխ հանողը քոռանա
Ինձի քեզի մոռանա:

Հարսնեկների պատասխան պարից հետո, քավորկինը խնդրում վեր, որ հարսնացուն ներկայացվի: Հարսնացուն գլխին վարդագույն մի քող գցած, հարսնաքույրերի

կողմից թեմնուկ բերվում էր թոնրաթում-րի (սաքուի) վրա: Քավորկինը նրա քողը վերցնելով, փոխարենը գլխին ձգում էր փեսայի կողմից ուղարկված փլփլավոր ճիճի, իսկ հարսի եղբայրը քողը գոտին էր կապում, ասելով՝ օխաբ ինձի պես, մեկը՝ քեզի պես: Մինչդեռ դհուլ-դուռնան թոնրաթմբի մոտ նվագում էր շեն աճամ-ի²³ տխուր մելոգիան, հարսնացուն քավորկինը, հարսնաքույրերի և հարսնեկների ուղեկցությամբ երգելով առաջնորդվում էր լողարան:

Հարսնացուին լողացնելու ամբողջ ընթացքում, հարսնաքույրերը երգելով, նրա գովքն էին հյուսում, իսկ լողանքի վերջում, ըստ ավանդական սովորության, հարսնացուի ուսերից ցած վարդաշուր էին շաղ տալիս²⁴, որի բուրմունքը մնում էր առագաստից հետո մինչև առաջին բաղնիքը, Հարսնաքույրերը, տարոսի համար, նույն վարդաշուրից խմում էին մեկ-մեկ ումպ:

Այսպես, մինչև ամուսնական պսակը կատարվում էին մի շարք ծեսեր և արարողություններ, որոնք հանդիսանում էին նոր ամուսնին բախտավորեցնելու նշանակություն ունեցող հմայամոգական գործողությունների վերապրուկներ: Միսական այդ արարողությունները Գամիրբի բոլոր շրջաններում հար և նման չէին: Օրինակ, Հալիսի միջին հոսանքի հայկական գյուղերում՝ Կեմերեկում և դրա շրջակա գյուղերում հարսնացուին հնայելու արարողությանը տղամարդիկ չէին մասնակցում, մինչդեռ Ակնա շրջանում դա հանդիսանում էր երկու սեռերի համար ամենախորհրդավոր և միաժամանակ հաճելի ժամանցներից մեկը: Կեմերեկի գյուղերում հարսնացուն լողանքից հետո, հարսանեկան հագուստները հագցրած, գլխին կարմիր փլփլավոր քող, հարսնաքույրերի կողմից առաջնորդվում էր թոնրաթմբի վրա, հատուկ պատրաստված

²³ Շեն աճամ, ժողովրդական բանահյուսությունը Հալիսի ստորին հովտի հայ գյուղերում՝ Կեմերեկից-Կեսարիա երգվում էր թուրքերեն, իսկ վերին հովտում, նույն բովանդակությամբ, բայց հայերեն:

Շեն մայրս, շեն մայրս տունդ շեն մնա, Ես գնում եմ ահա, տունդ շեն մնա:

²⁴ Հարսնացուի մարմնի վրա վարդաշուրի շաղ տալը ուներ իր սիմվոլիկ նշանակությունը, այսինքն՝ նոր ամուսնից կյանքը պետք է դիմավորեն բուրմունքով և վարդի քաղցրությամբ:

²² Սովորաբար լինում էին՝ մրգեր, շաքար, մեկ շիշ օղի, մետաքսյա կարմիր քող և հինա:

տեղը: Ըստ սովորության, հարսնացուն երեք անգամ նստեցնել կանգնեցնելուց հետո, նստեցվում էր նախշված բազմոցով մի աթոռակի վրա, այնպես որ նա իր դիրքով թոնրաթմբի վրա նստողներից ամենից բարձրն էր լինում: Քավորկինը հարսնացուի ափի մեջ մի պտղունց օրհնված հինայի փողուց խյուս պատրաստելով, դրա մեջ գետեղում էր մի դրամ, և կանչում մի պատանու, որպեսզի հարսնացուի ափի միջից դրամը վերցնի: Տղա երեխայի միջոցով հարսի ափի միջից դրամը վերցնելու և հարսնեղբոր կողմից մեջքի գոտին կապելու գործողությամբ, հարսնացուի համար հայցվում էր սերունդը շարունակող արու զավակներով բեղմնավոր կյանք:

Հարսնեղբորը օրհնված հինայից մի մաս վերցնելով, վերադառնում էին տղայի տունը՝ փեսան հինայելու համար: Փեսայի ձեռքի հնայման համար սովորաբար աճուրդ էր բացվում²⁵: Այդ պատիվը մնում էր ընդհանրապես ամենաշատ գումար առաջարկողին, որի ժամանակ հատկապես փեսաները մրցման էին հրավիրում՝ իրենց ծանոթների ձեռքը նույնպես հնայելու համար:

Հալիս գետի ստորին հովտի հայ գյուղերում, հատկապես Կեմերեկում, հինադրեքի օրը՝ շաբաթ գիշերը տեղի էր ունենում նաև ճիճա ասկրելու արարողությունը: Փեսան կես գիշերի մոտերը, մոմձիի (խաչեղբոր) ընկերակցությամբ գնում էր հարսնատունը: Հարսնացուն կանխապես որոշված մի վայրում իր ամուսնացած քրոջ կամ եղբոր կնոջ հետ սպասում էր փեսայի գալըստյան, որտեղ փեսան և հարսնացուն առանձնանալով տան մի անկյունում, ողջագուրվում էին: Փեսան համբուրելով հարսնացուի աչքերը, իր հնայված ձեռքը նրան էր երկարում, որ հինայի թաշկինակը քանդի և ասում էր. էռջի սերս դուն իս, իսկ հարսնացուն համբուրելով իր նշանածի ձեռքը, թաշկինակը քանդում և պատասխանում էր՝ էռջին եղ ու աչքս պղտուր բանամ, քեզ պլտ ու տեսնամ:

Մոմձին և հարսնաքույրը, որ սպասում էին դռանը, կատակով իմացնում էին, որ

²⁵ Այդ աճուրդից գոյացած գումարը հատկացվում էր եկեղեցուն և դպրոցին:

երկայն եղավ, որի վրա փեսան ու հարսնացուն անմիջապես սենյակից դուրս էին գալիս: Հարսնաքույրը շնորհավորելով ներանց, ասում էր՝ մեկ բառի վրա ծեփանա՛, երկուստեք բարեմաղթություններից հետո փեսան և մոմձին վերադառնում էին հարսնեղբատուն, որտեղ խրախճանքը շարունակվում էր մինչև առավոտ:

Պետք է ենթադրել, որ ճիճան ասկրելու ծիսական արարողությունը նախքան կուսուրքյան սավան-ի ընդհանուրի առաջ ցուցադրությունը. ուրիշ բան չէր նշանակում, եթե ոչ հարս ու փեսայի կույս լինելու խոստովանությունը, փոխադարձ սիրո և հավատարմության երդում:

Ակնում հարսի հինադրեքի խրախճանքին, ըստ ընդունված սովորության, մասնակցում էին և տղամարդիկ և կանայք: Քավորը և քավորկինը, բռնած բյուրեղյա նախշուն մի ափսե, որի մեջ բրգաձև դիզված էր լինում հինան, կենտրոնում թաղված՝ սպիրալաձև ոլորված մոմի խուրձ²⁶, առաջանում էին դեպի սրահի կենտրոնը: Նվագի հետ դեռատի հարսներ և աղջիկներ, քավորի և քավորկնոջ շուրջը բոլորված, սկսում էին երգել:

Աս հինան ան հինան չէ

Ղրկողն ալ ինչ աղվոր մանչ է:

Խրախճանքի ընթացքում հարսնացուն հարսնաքույրերի կողմից ներքնասենյակից առաջնորդվում էր սրահի կենտրոնը և մի բարձի վրա նստեցնելով, սկսում էին հինայելու արարողությունը:

Մինչ հարսնացուի մատները հնայում էին, հարսնաքույրերը երգում էին.

Ոսկի ամանի մեջ հինաս շաղեցին,

Արծաթե սանտրով խոպոպս քակեցին...

Հինադրեքից հետո սկսվում էր դեմառդեմ թեպարը, ուր պարող զույգերը պատշաճության կարգով այնպես էին իրար հաջորդում ու փոփոխվում, որ հարսնացուն,

²⁶ Մոմի խուրձը՝ հավանաբար Աստվածաշնչի բացավառվող մոմերը հիշեցնող և նրա խորհուրդը արտահայտող մի նշան էր, դեռևս ավելի հնուց եկող, բան Աստվածաշնչին ծանոթանալու:

անկախ իր կամքից, գտնվում էր իր փեսացուի դեմ:

Այդ միջոցին հանդիսականների կեցցեների ու ծափերի տարափի տակ հռչակվում էր նրանց ընտանեցումը²⁷:

Այսպես, հայկական հարսանեկան բոլոր հին ժեսերն ու արարողությունները դեռևս պահպանվում էին Գամիրքի բոլոր շրջաններում, արարողությունների որոշ կողմերով տարբերվելով իրարից: Օրինակ, գյուղերում, հարսնացուի հինադրեքից հետո, հարսնեկորները նախքան փեսայի տուն վերադառնալը հանդիսատես էին լինում օժիտի ցուցադրությանը, այլ խոսքով՝ կանչին:

Հարսնաքույրերը օժիտի սնդուկը բերում էին ֆուրսի մոտ: Նրանցից ամենատարեցը, որը սովորաբար լինում էր հարսնացուի մոր կողմի ազգականներից մեկը, բաց անելով սնդուկը, սկսում էր բացականչություններ մի առ մի ցուցադրել ինչպես աղջկա հարսանեկան շորերը, նույնպես և հարսնացուի ստացած և տանելիք նվերները: Ընթերցելով քսի մը դուռնի, շեն մնա: Շեն մնա, ձայնակցում էին հարսնաքույրերը և այսպես բոլոր նվիրատուների հասցեին շեն մնա կանչելով, ցուցադրվում էր օժիտը²⁸, Օժիտ-տեսից հետո հարսնեկորները, ըստ սովորության, տարոսը տունը տանելու համար չէին մոռանում նաև հարսնատնից գողանալու զանազան իրեր:

Հարսնառը, որ ամուսնական հանդեսի երրորդ արարվածն էր հանդիսանում, համայն-մոզական արարողությունների, ժեսերի վերապրուկներով ամենահարուստն էր: Հարսնառը Գամիրքի բոլոր շրջանների համար. մի ընդհանրություն ունենալով հան-

դերձ, ուներ նաև տեղական առանձնահատկություններ, կատարման ձևերի բազմազանություն: Այդ ամենը շրջանից շրջան տարբերվում էր, հատկապես, երբ հարսնառը կատարվում էր մի գյուղից մյուսը:

Հարսանիքը, երբ տեղի էր ունենում միևնույն վայրում, հարսնառի (ենկե) կազմի մեջ մտնում էին փեսան և մականները, քավորը և քավորկինը, ինչպես նաև չափահաս ամուրի ու նշանված աղջիկներ և նորահարսեր: Առաջինները գլուխներն ու դեմքերը բաց, իսկ վերջինները՝ շաք-ով ծածկված: Մինչդեռ մի գյուղից մյուսը հարսնառին մասնակցում էին մեծ մասով տղամարդիկ: Այս վերջին դեպքում հարսնեկորները, որ ձիավոր էին լինում, գյուղին մոտեցած, օգի մեջ հրացանների համազարկերով գյուղի վրա հարձակվում էին գործում, իսկ գյուղի գլխավոր մուտքը տեղացի երիտասարդների կողմից պարաններով փակված էր լինում: Ծանապարհ տալու համար պահանջվում էր ավանդական նվերը՝ յալ: Ազատ մուտք էր տրվում այն ժամանակ, երբ քավորի կողմից տրվում էր պահանջված նվերը:

Հարսնեկորների թափորը, քավորի և մականաբաշի գլխավորությանը, հաղթական տեսքով մտնում էր գյուղը²⁹ և մինչև հարսնետունը հասնելը դհուլ-զուռնայի նվագակցությամբ, ուրախության բացականչություններով ու համազարկերը թնդացնում էին ամբողջ գյուղը: Հարսնետան մոտերքը հասնելով, մականաբաշին (խաչեղբայրը) բռնո, բռնո գոռալով, արագընթաց ձիարշավով հարսնետան դռան առաջից, կրկին ետ էր դառնում, դիմավորելու համար հարսնեկորներին: Այստեղ էլ հարսնետան մուտքն էր փակ լինում, բայց այս անգամ տան դռները փակվում էին ոչ թե համայնքի երիտասարդության, այլ նույն գերդաստանի մոտիկ ազգականների կողմից:

Քավորը այստեղ ևս դրամական մի նվեր տալով կամ յալեռայրմ ասելով, դռները բացել էր տալիս: Բակում հարսնեկորներին դիմավորում էին աղջկա ծնողները, մոտա-

²⁷ Ա. Քելչան, Ակն և Ակնցիթ, Փարիզ, 1952, էջ 219:

²⁸ Գամիրքի գյուղական վայրերի օժիտի մեջ սովորաբար լինում էր 10 շապիկ, 10 շապկեցիկեր, 10 գոգնոց (երկու տեսակ, մի մասը՝ բարակ, նուրբ, մյուս մասը՝ սովորական), մի ալ-կարմիր գոգնոց չուխայից (մահուդից), մի էնթարի կեսարական ալաճայից, արծաթոսկեթել ասեղնագործված սալթա, մեկ կամ երկու Կյուրինի կամ, ինչպես կոչվում է՝ բողջա-շալ, բրդից հյուսված նախշուն գուլպաներ, օղեր, մատանիներ և անպայման մի արծաթ գոտի: Տանելիք նվերների մեջ կեսրոշ համար լինում էր մի գոգնոց, մեկ նախշուն բռնօղակ, մի թաշկինակ, կեսրարի համար՝ շապիկ, վարտիկ, մի գուլգ նախշուն գուլպա, անձնոց (երեսսրբիչ), տագրերից յուրաքանչյուրին՝ մեկ շապիկ և այլն:

²⁹ Հարսնառի ծիսական արարողության մեջ զինված հարսնեկորների բռնի գյուղ մտնելու փորձերն են ուրիշ բան չի ներկայացնում, եթե ոչ հնագույն ժամանակների կանանց առևանգման երևույթի վերապրուկը:

կա բարեկամները, հարսնեքույրերը, հաղացվում էր ավանդական խոնշան, որին հաջորդում էր տղամարդկանց շուրջպարը (հալայ), իսկ կանայք դեմ առ դեմ զույգ-զույգ պարում էին շառալար-ը կամ երկ-երկու հոգով թևանցուկ՝ քամզաբան:

Պարերից հետո հարսնեքույր տղամարդիկ հյուրասիրվում էին օդայում, իսկ կանայք՝ թոնրատանը: Օդայում աղջկա կողմը հարս-նեքույր տղամարդկանց հետ մրցում էր հանե-լուկներով, շուտասեղիքներով, աշուղնամե-ներով և որոշ շաբաբներով, մինչդեռ թոնրատանը թաքստոցից գտնված հարսնա-ցուի գլուխը հարդարում էին³⁰, պատրաս-տում տանելու:

Հարսի հարդարանքը ավարտելուց հետո դհուլ-զուռնան սկսում էր նվագել հայտնի Տաճում եմ մեկամաղձոտ եղանակը: Աղջիկը իր վերջին հրաժեշտի ժամանակ, հուզված, ողջագուրվում էր ծնողների հետ: Մայրը, աղջկա գովքն անելով, լալագին երգ էր հո-րինում՝

Եկուր նայեմ, յավրուս եկուր,
Մանչ կարծեցի աղջիկ է եղեր,
Ուրիշի աղջիկը ըլլեյիր
Իմ մոտս հարս ըլլեյիր:
Տունիս համը աղջիկս,
Աղամանին աղը աղջիկս,
Մերդ թողեր կիյաս կա,
Մեծ տունին սյուսը աղջիկս³¹:

Հարսնեքույր կանայք աղջկա լեզվով պա-տասխան խաղ էին ասում.

Մի լար մայրիկ, մի լար մայրիկ,
Իս մի լացներ,
Եկած դավուլ-զուռնաներս
Ետ մի դարձներ:

Հարսնացուն հրաժեշտի պահին համբու-րում էր իր մորը և տարեց կանանց ձեռնե-րը, նույնն էր անում նաև փեսան: Զոքանչ մայրը, փեսային համբուրելով, ասում էր՝ խեբը տեսնես և նրա վզին կապում էր փե-

սայի ավանդական կարմիր ալ-ֆեֆիյեն (ուսկապը), իսկ փեսամանտիկի (հարսնեղ-բոր) վզին՝ մի ավելի փոքրը:

Հարսնաքույրերը հարսնացուի թևերը մտած, առաջնորդում էին մեծ տան դռան առաջ, որտեղ շարքով սպասում էին աղջկա հայրը, եղբայրները, հորեղբայրները, քեռի-ները և ուրիշ մոտիկ բարեկամներ: Հարս-նացուն համբուրում էր նրանց յուրաքան-չյուրի ձեռքը, որոնք դրամական նվերներ՝ խարշլըխ (ծախսի փող) էին տալիս իրենց աղջկան: Այդպես նրան թևանցուկ արած առաջնորդում էին մինչև բակի դռան առաջ և խեբը տեսնեմ ասելով, հանձնում հարս-նառի դեկավարին:

Փավորը, մակարաշին ընդունելով հար-սին, նստեցնում էին զարդարված ձիու վրա և առաջնորդում եկեղեցի: Հարսանեկան թափորի առջևից գնում էր գհուլ-զուռնան, հարսի մի կողմից քայլում էին փեսան, փե-սամանտիկը և քավորը, մյուս կողմից ա-զապ բաշին (մոմճի) և ազապները (մա-կարներ): Հարսի խմբի ետևից համաբայլ քայլում էր մակարների աբհեսապկան ռալ-աբ, իսկ հարսնեքույր կանայք, քավորինոջ գլխավորությամբ գնում էին թափորի ետե-վից: Մինչդեռ երկու մակարներ, իբր թե արար՝ դեմքերը սևով մրոտած, այլանդակ հագուստներով և մատներին բոժոժներ, որ-պես խափշիկ վհուկներ, վաճ, վաճ կանչե-րով, թափորի երկու կողմերից ետ ու առաջ էին վազվզում. և բոժոժները շղկրտացնում. վանելու համար տնեհույթ շաբեհեթ, որ-պեսզի ամուսնացողներին չվնասեն:

Հարսանեկան թափորը հասնում էր եկե-ղեցու գռան առաջ, որտեղ միայն այդ ձայ-ները դադարում էին: Հարսին ցած էին իջեցնում ձիուց, և եկ թևից քավորից, մյուսից փեսան բռնած, քավորը և փեսա-մանտիկը առաջանում էին մինչև եկեղեցու դասի առաջ: Այստեղից պսակող քահանան հարս ու փեսին և փեսամանտիկին առաջ-նորդելով դասից ներս, հասցնում էր սեղա-նի առաջ և այստեղ հարս ու փեսին կանգ-նեցնում իրար դիմաց, գլուխ-գլխի և նա-րոտը կապելով նրանց գլուխներին³², խոր-

³⁰ Հարսի գլխի հարդարանքը բաղկանում էր ընդհանրապես ռսկե գլխարկից և մի կարմիր փլփլա-վոր բողից:

³¹ Կեմերեկից Կեսարիա ժողովրդական երգերը թրքերեն էին լինում:

³² Մինչդեռ կարմիր-կանաչ թելերով հյուսված այդ նարոտը Արևելյան Հայաստանում կապում էին հարս ու փեսի վզին:

հըրդավոր հանգույցն էր անում: Իսկ փեսամանտիկը, այսինքն՝ սաղառնը նրանց գլխին բռնում էր խաչը: Արարկիրի շրջանում պսակի արարողության ժամանակ քավորը հարս ու փեսի գլխավերև բռնում էր նաև մի կեռ սուրճ³³, Ծրք քահանան սկսում էր պսակի արարողությունը, քավորը և քավորկինը, որպեսզի շաբեհ-ը փեսին չկապեն... Իրենց գրպաններում բացված փոքր կողպեքը և կամ գանակը փակում էին, շմոռանալով սակայն վերստին բաց անել նախքան առաջաստի գիշերը:

Պսակի արարողությունից հետո հարսանեկան թափորը վերադառնում էր հարսանեկան տունը, նախօրոք որոշված ճանապարհով, նույն կարգով ու ձևով: Այդ ճանապարհը պետք է անցներ ինչպես աղջկա ծնողների, նույնպես և քավորի ու ծանոթ բարեկամների տների առաջից: Սա հարսանեկան անխախտ ծեսերից մեկն էր համարվում, որի ընթացքին ազգականները նվեր էին տալիս հարսին:

Գամիրքի գյուղական վայրերում, ընդունված սովորության համաձայն, հարսանեկան թափորի ժամանակ աղջկա հայրը, որպես նվեր, տալիս էր մի անասուն (կով, երինջ, հորթ, տխար կամ գառնուկ), իսկ տղայի ազգականները, իրենց հերթին, կերպասեղեն և չթեղեն նվերներով զարդարում էին հարսի երկու թևերը և ձիու վիզը: Մինչդեռ քաղաքային վայրերում, հատկապես Արարկիրում, բարեկամներն ու ծանոթները հարսնեկոթների ճանապարհին ըմպելիքի սեղան էին հանում, իսկ շրջակա գյուղերում, հատկապես Անջրդի գյուղում, հարսի գլխին խնձոր և բոլով մանր դրամ էին տեղում:

Հարսանեկան թափորը, երբ հասնում էր իր վերջին հանգրվանը, այսինքն՝ հարսնատունը և կանգ առնում դռան առաջ, քավորը խոսքը տղայի ծնողներին ուղղելով, ասում էր՝ հաբսը ձեռք վառ չի իջնում, ի՞ր նվերն է (յալը) պահանջում:

Կեսրայրը համաձայն իր նյութական կարողության և զբաղմունքին, խոստանում էր կաթնատու մի անասուն: Կամ մի զարդոսկի, կեսուրը՝ իր հարսնության ապարանջանը, մատանին կամ արծաթ գոտին: Հար-

սը դեռ ձիու վրա, տան բոլոր անդամները՝ ամենատարեցներից մինչև դեռատիները, միասին պարում էին թագավորի ու թագուհու առաջ: Այսպիսով, տնեցիները իրենց հավանությունն ու ուրախությունն էին արտահայտում տան մի նոր անդամի (հարսի) ավելացման համար:

Կեսուրը տնեցիների զգացումներին որպես թարգման, հարս ու փեսին ուղղված խաղ էր ասում.

Երկու ֆիտան ժամուց կուգան,
Առնենք, ելլանք վերի օդան,
Նազ ըրե, նազդ վերցնեմ,
Ալադով³⁴ շաքար կերցնեմ:

Հարսը, երբ կեսուրը հրավերի վրա ձիուց վայր էր իջնում, նախքան տան շեմից ներս մտնելը, կատարվում էին նույնպես ծիսական որոշ արարողություններ: Օրինակ, մականներից մեկը, որպես առատության խորհրդանշ, տան կտուրից վայր էր նետում մրգեղենով, շաքարեղենով լեցուն մի բզուկ, որը փշրվում էր հարսի ոտների առաջ: Տան օջախի պաշտպան ոգիների օգնությունը հայցելու համար, հարս ու փեսի ոտների առաջ ընդհանրապես մի աքաղաղ էին զոհաբերում, իսկ Արարկիրում մականները եղջյուրներին վառած մոմերով ու վզին կարմիր ժապավենով զարդարված մի խոյ, իրենց ուսերի վրա թագավոր ու թագուհու առաջ պարելուց հետո, զոհում էին: Այսպես յուրաքանչյուր շրջան, ըստ իր տեղական սովորության և յուրաքանչյուր տնտեսություն, ըստ իր նյութական կարողության, մատաղ էր անում մի աքլոր կամ մի խոյ: Հալիսի միջին հովտի գյուղերում տան շեմքի վրա, հարսին մատուցվում էր մեղր ու կարագով եղանակ, որպես խորհրդանշ ընտանիքի անդամների միջև բարի հարաբերության ու համերաշխության: Հարսը մատը թաթախելով եղանուշին, խաչանշան էր անում դռան սեմի ճակատին, իսկ եղանուշի պնակը որպես տալիս էր մականաբաշուն (ազապաշուն), որի ձեռքից իսկույն խլում էին ամուրի երիտասարդները՝ տարոսին ավելի շուտ արժանանալու համար:

³³ Տե՛ս «Ոսկեգետակ», տարեգիրք, Բեյրութ, Բ. Կարի, 1946, էջ 208:

³⁴ Ալազ տաճկերեն բառ է, նշանակում է գործիք, փոխաբերաբար՝ ունելի:

Տան շեմքի վրա, կեսուրը, համբուրելով հարսին ու իր տղային, ասում էր. «Հարսս, ռտքդ երջանկաբեր, գլուխդ բախտավոր լինի»³⁵։ Մինչդեռ Ակնում, հարսն ու փեսան տան շեմքից ներս մտնելու ժամանակ հարսի կեսուրը և կնքամայրը (քավորկինը), իսկ Արաբկիրում՝ տղայի հայրը և մայրը, կամ, հոր բացակայության դեպքում, տղայի մայրը և քավորը իրենց թևերով կազմած կամարի տակից անց էին կացնում հարս ու փեսին՝ ի նշան հնազանդության³⁶։

Ուշադրության արժանի են նույնպես տան շեմքից ներս կատարված ծիսական արարողությունները։ Կնքներեկում հարսը թոնրաթմբից վեր բարձրանալու ժամանակ, նրա ոտնամանի մեջ ձգվում էր մի դրամ և կանչում մի տղայի և ոչ աղջկա, որպեսզի հարսի ոտնամանը հանելով, միշի դրամը առնի, որպեսզի հարսի առջնեկը տղա լինի։ Տղա զավակ ուզելու բաղձանքը Գամիրքի, հատկապես Սեբաստիայի շրջակա հայ գյուղերում արտահայտվում էր նաև մի այլ ձևով։ Տան շեմքից ներս, հարսնևոր բազմազավակ մայրերից մեկը, ձեռքին խնկամանը բռնած, երեք անգամ հարս ու փեսի շուրջը պտույտ կատարելով, որպես բարեմաղթանք, փեսային ասում էր՝ օխա՛ր քեզ պես, մեկը ինձի պես³⁷, իսկ Կեսարիայի շրջակա գյուղերից էվքերեում, հարսը հագցնելու ժամանակ մի դեռատի տղա կամ հարսի եղբայրը գոտին կապելով, ասում էր. յոթը տղա, մեկ աղջիկ³⁸։

Որպես մանչ զավակ ունենալու բաղձանքի նշան, հարսնաքույրերը (յենկենները) Թոնուզ գավառակի հայկական գյուղերում՝ Գարակուլից մինչև Ուլաշ, կարմիր աքաղաղի պոչի փետուրներից երեք ունջ ամրացնում էին իրենց գլուխների հարդարանքին։

Հարսը թոնրաթմբի (սաքու) վրա իր համար նախօրոք պատրաստված տեղը գրավելով, ըստ ավանդական սովորության,

պատին կռթնած, ոտքի վրա, ձեռքերը կրծքին, մինչև երեկո պետք է բարև բռներ։ Այդ վայրկյանից, նա որոշ ժամանակով կորցնելու էր խոսելու իր ազատությունը, մինչև մայր դառնալը, որպես հարգանքի նշան, պետք էր մուկ կենալ և ճաշելու ժամանակ բերանի առաջ թաշկինակ բռնել։

Պսակի առաջին օրը, մինչև երեկո տևող խրախճանքներից հետո, երբ աղջկա կողմի խնամինները մեկնում էին, նրանց հետևում էին նաև փեսայի հյուրերը, իսկ մնացողները՝ փեսան իր ընկերներով և հարսը հարսնաքույրերով, առանձին սենյակներում գիշերում էին, հանգստանում։ Մյուս օրը առավոտյան վերսկսվում էր հարսանեկան բարախությունն ու կերուխումը, որը, ըստ սովորության, կատարվում էր ավելի նեղ մի շրջանակում։ Առավոտյան հացկերույթի գլխավոր ճաշը լինում էր խաշը կամ, ինչպես Գամիրքում ասում են՝ փաշան, որի պատճառով այդ օրը, այսինքն՝ նախքան առաքաստը, կոչվում էր խաշի կամ փաշայի օր³⁹։

Առաքաստից առաջ, երեկոյան տեղի էր ունենում նարոտի քանդումը։ Տաներեց քահանան քավորի, քավորկնոջ, խաշեղբոր, հարսնեղբոր, տղայի ծնողների և նրանց մոտակա բարեկամների ու ազգականների նեղ շրջանակում, հարս ու փեսային գլուխ գլխի դնելով, օրհնում է նարոտը և ապա քանդում այն հանգույցը, որ կապել էր պսակի արարողության ժամանակ։ Իսկ քավորը և քավորկինը իրենց հերթին. վերստին բաց էին անում այն դանակը կամ փոքր կողպեքը, որ փակել էին պսակադրության ժամանակ, որպեսզի փեսան կապված չմնա։

Հետանիքի ծոցում այս նոր անդամի՝ հարսի մուտքը սրբազործելու համար քահանան մի բաժակ կարմիր գինի օրհնելուց հետո, խմեցնում էր նախ հարս ու փեսին և ապա նույն բաժակից մեկ-մեկ ումպ էլ՝ բոլոր ներկաներին, իբրև արյունակից դարձնելու, տոհմագրման խորհրդանիշ։

Գամիրքի որոշ շրջաններում, հատկապես Կնքերեկից Կեսարիա, նարոտի քանդումից հետո, նախքան առաքաստը, տեղի

³⁵ Կնքերեկից դեպի Կեսարիա հայկական գյուղերում ինչպես հարսանեկան երգերը, նույնպես և լարեմաղթանքները ընդհանրապես լինում էին թուրքերեն՝ «Կեյլինիմ ալադըն դառիմլի, պաշըն դավլեալի օսլալն»։

³⁶ Ա. Քեյլան, Ակն և Ակնցիք, Փարիզ, էջ 270։

³⁷ Վ. Համբարձումյան, Գյուղաշխարհ, Փարիզ, 1927։

³⁸ «Բիրակն», Կ. Պոլիս, 1900, էջ 724։

³⁹ Առաքաստի հաջորդ առավոտը, հելվայով մեծարելու հետևանքով, կոչվում էր հելվայի օր։

էր ունենում հարսի պարը: Ազգական կանանց նեղ շրջանակում, հարսնեքույրերից մեկը տեֆը ձեռին Հաւսս խրատական երգի եղանակով, պարել էր տալիս հարսին՝ ձեռքերին բռնած երկու փոքր հայելիներով: Դա հարսի աղջկության վերջին պարն էր համարվում նախքան առաջաստ մտնելը: Այդ պարի ժամանակ, հարսի պարտականությունները հիշեցվում էին երգի բառերով՝ ամուսնուց անբաժան, լեզուն անուշ, տան գործերով զբաղված, ճուռ հաւսս և այլն:

Մինչ հարսի պարը, տեղի էր ունենում փեսու առեկտը: Նախքան առաջաստը, մականները փեսային գողացնում էին և ազատ թողնում այն ժամանակ միայն, երբ քաղորդ խոստանում էր մի խրախճանք կազմակերպել: Փեսայի առեկտումը տղայի ընկերների կողմից, թեև կատարվում էր որպես իմաստը կորցրած մի սովորություն, այնուամենայնիվ, կարելի է ենթադրել, որ դա մի մնացուկ է տոհմական-համայնական հասարակարգի, որի ժամանակ տոհմակից երիտասարդները որոշ իրավունք ունեին ուրիշ տոհմից առևանգված աղջկա վրա, մի իրավունք, որը մեր օրերում փոխարկվել է նվերի գանձմամբ:

Գամիթի, հատկապես կեմերեկ գյուղաքաղաքում նախքան հարս ու փեսային առանձնացնելը, նրանց խորհրդատուները՝ ազապբաշին փեսին, իսկ հարսնեքույրը հարսին զոց սեդուկի ալաբանական առակով բացատրում էին կյանքի խորհուրդը:

Առաջաստի հաջորդ առավոտյան տեղի էր ունենում հարսի ծնողներին աչքալույս տալու երթը: Տղայի մայրը, քավորկինը և մոտիկ ազգական տարեց կանայք կուսուքյան սավանը կարմիր ժապավեններով զարդարած, մի սակառի մեջ դրած, վրան էլ մի խնձոր գնում էին աղջկա ծնողներին շնորհավորելու: Աղջկա կուսուքյան պահանջը կենցաղում արմատացել է հավանաբար մասնավոր սեփականության ու մենամուսնության ծագման համընթաց և ֆեոդալական իրավակարգում, որը սրբագործել էր եկեղեցին:

Գամիթի գյուղական վայրերում, ինչպես նշվեց, մինչև առաջին համաշխարհային պատերազմը հայ նահապետական ընտանիքը դեռևս քայքայված չէր բոլորովին:

Հին տոհմային կարգը թեև փոխարինվել էր հասարակական նոր հարաբերություններով, այնուամենայնիվ, հնի մնացուկները ամբողջովին չէին անհետացել նույնիսկ քաղաքային վայրերում: Իրենց հիմքից կտրված այդ հմայա-մոգական գործողությունները թեև առանց որևէ ատրիբուտի, այնուամենայնիվ, որպես ծիսական վերապրուկ, դեռևս պահպանվում էին ժողովրդի կենցաղում:

Այս բոլորը վկայում են այն մասին, որ ինչպես ամենուրեք, այնպես և հայ ժողովրդի և նրա հարազատ մասը կազմող գամիթահայերի հոգևոր կուլտուրայում որոշակի տեղ են գրավել անիմիստական-հոգեպաշտական հայացքները և տոհմային աշխարհայացքի ու նրանից ծագած բարքերի ու ծեսերի հազարամյա ազդեցությունն այնքան զորավոր է եղել, որ նոր ժամանակներում տեղի ունեցած սոցիալ-տնտեսական զգալի փոփոխություններից հետո էլ պահպանվել էին որպես վերապրուկ, հաճախ իմաստը կորցրած ու կիրառողների կողմից անբացատրելի:

Գ. ԱԶԳԱԿՑԱԿԱՆ ԵՎ ԴՐԱՑԻԱԿԱՆ ՀԱՐԱԲԵՐՈՒԹՅՈՒՆՆԵՐԸ

Ազգակցական և դրացիական հարաբերությունները, հատկապես Գամիթի հայկական գյուղերում, դեռևս մինչև 20-րդ դարի սկզբները իրենց վրա կրում էին հին ավանդական սովորությունների դրոշմը: Դա հասկանալի է, որովհետև հին գյուղը հին ավանդական սովորությունների լավագույն պահպանողն է հանդիսանում:

Ինչպես հայտնի է, մինչև 19-րդ դարի 50-ական թվականները Արևելքում ընդհանրացած հողօգտագործման իրավունքով Արևմտյան Հայաստանում հողը գրված էր գյուղական համայնքի տնօրինության տակ: Յուրաքանչյուր գյուղ ուներ իր հուտառալավ՝ մե-ն՝ սահմանադիրը, որի մեջ նշանակում էին գյուղին պատկանող հողատարածությունների սահմանները, որոնց մեջ պարփակվում էին գյուղական համայնքի վարելահողերը, մարգագետինները, արոտավայրերը: Այս ամենը գյուղական համայնքի ընդհանուր սեփականությունն էր կազմում, իսկ գյուղական համայնքի մեջ մտնող

տնտեսությունները համայնքի հողերից մշակում էին այնչափ, որչափ հնարավորություն և միջոց ունեին և մշակված հողը պահում էին իրենց ձեռքում որպես հագգը-գաղար-ով տրված իրավունք⁴⁰:

Սակայն, ինչպես ողջ Թուրքիայում, այնպես և Գամիրքում կային նաև թիմարային և վանքապատկան գյուղեր կամ ագարակներ, որտեղ սակավահող գյուղացիները կիսարաբության (օթթախիություն) կամ վարձակալության շատ ծանր պայմաններով հող էին մշակում: Գամիրքի տարրեր շրջաններում, բացի բազմաթիվ անհատ տնտեսություններից, որոնք գտնվում էին վերոհիշյալ պայմաններում, կային և թիմարային գյուղեր ու գյուղախմբեր, որոնց մեջ սաստիկ խորացել էր տնտեսական անհավասարությունը: Օրինակ՝ Սաբոսի ներքին հովտում Զամանթի (Մամնդավ) գետեզրին կար յոթ գյուղ, որոնք վարձակալության խիստ ծանր պայմաններով հող էին մշակում նեպի-բեյի թիմարում⁴¹: Դրանցից երեքը՝ Յենիճեն, Յալգը Բուրունը, Ղազը Կոմեզին կազմված էին Թումարզայի սակավահող հայ գյուղացիներից, իսկ չորսը թուրքերից՝ Յուսեյունյու, Փունզու, Մելենկի, Բոլտաճը: Նրանք բացի վաշխառուական բարձր տոկոսների համար վճարումից, տարեկան բերքի մեկ ութերորդը տալիս էին պետությանը, իսկ մեկ տասներորդը՝ փաշային⁴²:

Գյուղական համայնքում հողօգտագործման հին ձևը 1858 թվի թագավորական հատուկ հրովարտակով հիմնականում փոփոխության է ենթարկվում: Օսմանյան պետությունը Ղրիմի պատերազմից հետո իր հատկապես Անգլիային և Ֆրանսիային տրվելիք բազմապատկված պարտքերը հետըզհետե մարելու նպատակով, հողային կալվածների անհատական սեփականություն՝ քափալ է սահմանում: Ուստի մինչ

այդ հագգը-գաղար-ի իրավունքով, յուրաքանչյուր տնտեսության մշակած հողը նրա անհատական սեփականություն էր ճանաչվում:

Այսպես, 19-րդ դարի երկրորդ կեսի սկզբներից սկսած, օսմանյան պետության նոր եկամտահարկերը մի կողմից, առևտրավաշխառուական կեղեքումները մյուս կողմից, ավելի ևս խորացնում էին գյուղի շերտավորումը: Նահապետական մեծ ընտանիքները սկսում են քայքայվել, հետևաբար և սկսում են առաջանալ որոշ փոփոխություններ նաև ազգակցական և դրացիական հին հարաբերությունների մեջ: Այնուամենայնիվ, Գամիրք գավառի հաղորդակցության ճանապարհներից հեռու, մեկուսի ընկած շրջանների գյուղերում, մինչև համաշխարհային առաջին պատերազմը, ազգակցական և դրացիական հին սովորույթները հիմնականում պահպանվում էին, քանի որ այդ վայրերում շուկայական հարաբերությունները շատ թույլ էին ու դեռևս գերիշխում էր բնատնտեսությունը: Ազգակցական հարաբերություններն իրենց արտահայտություն էին գտել, օրինակ, մեկ ազգատոհմի պատկանող արական գծով ընտանիքների մեկ թաղամասում բնակություն հաստատելու, համատեղ սար բարձրանալու, դրացիների միջև փոխօգնության, հյուրասիրության, իրար պաշտպանելու վրիժառության, ինչպես նաև՝ բնության արհավիրքներից զերծ մնալու համար հավաքական զոհաբերությունների՝ մատաղների, ուխտագնացությունների մեջ:

Գամիրքի Արդեոս (էրճիաս) լեռան ստորոտում գտնվող Ճյուճյուն գյուղը Կեսարիայի թրքախոս հայկական գյուղերից մեկն էր, ընդամենը 150—160 ընտանիքով, բնակված ըստ ազգատոհմների՝ չորս առանձին թաղերում: Այդ թաղերից յուրաքանչյուրը կոչվում էր տվյալ վայրում բնակվող ազգատոհմի անունով: Օրինակ, Չորդյուք-օղլուլար մահլասի, Պարսամ-օղլուլար մահլասի, Կյուլապ-օղլուլար մահլասի և Լեոն-օղլուլար մահլասի (իմա՝ այսինչի որդիների թաղ):

Գամիրքի հյուսիս-արևմտյան կողմը՝ Ագ-դաղի անտառամիջում կար հայկական Չաթ գյուղը, որտեղ միևնույն ազգատոհմին օղլուլար մահլասի (իմա՝ այսինչի որդիների

⁴⁰ Ա. Միրոյան, Հողային հարցը Թուրքահայաստանում, «Գործ» ամսագիր, Բաքու, 1917, № 4, էջ 65—66:

⁴¹ Օսմանյան սուլթանները, ռազմա-ֆեոդալական այդ երկրում, զինվորական ծառայությունների համար որպես նվեր, հողեր էին տրամադրում ավարի սկզբունքով:

⁴² Հալիդ Ա. Արզումանյան, էվերեկի պատմությունը, Ա, դիրք, Գահիրե, 1935:

լանջերին, առանձին շարքերով. կառուցել էին իրենց տները: Այդ շարքերից յուրաքանչյուրը կոչվում էր թաղի այդ մասում բնակություն հաստատած ազգատոհմի անունով: Այսպես, Վարդապետենք, Դեմիր-ճենք, Պեհն-օղլուենք, Քեշիշ-օղլուենք, Կուլաղոզենք և այլն: Պետք է նշել, որ բացի հեռավոր շրջանների գյուղերից, քաղաքատիպ մեծ ավաններում, նույնիսկ քաղաքներում կային թաղեր, որոնք կոչվում էին ազգատոհմի անունով: Օրինակ՝ Արաբկիր գյուղաքաղաքում Ալմասեքյանց թաղը, Եկավենց թաղը, Տերբեղերենց թաղը, իսկ Սեբաստիա (Սվաղ) քաղաքում՝ Պլեճենց թաղը, Թաթևսենենց թաղը և այլն: Որոշ թաղեր էլ, թեև ազգատոհմի անունով էին կոչվում, բայց արդեն կորցրել էին իրենց ազգակցական կցաթաղի նախկին հատկանիշները: Մինչդեռ հեռավոր շրջանների գյուղերում, կցաթաղերը ոչ միայն պահում էին իրենց ազգատոհմի անունը, այլև ազգակից: Ղրացիները թեև տնտեսապես ինքնուրույն էին և առանձին տներում էին ապրում, սակայն, ինչպես ընդունված էր շատ հայաբնակ նահանգներում, դեռևս իրար մեջ պահպանում էին նույնիսկ հաղորդակցության հին միջոցները: Օրինակ, մեկ տնից մյուսը գյուղություն ունեին պատերի մեջ բացված ակնատներ, Գամիրքի բարբառով՝ պատժակեր, ինչպես նաև՝ պարտեզների, բակերի միջև խճուղի, դռներ և գետնափոր գաղտնի անցքեր: Առաջինի միջոցով, եթե կատարվում էր առօրյա խոսակցական հաղորդակցությունը, ապա խճուղի, գետնափոր անցքերի, ներքին դռների միջոցով առանց փողոց դուրս գալու, հատկապես վտանգի, հարձակման ժամանակ, հեշտացվում էր հավաքական ինքնապաշտպանության կազմակերպումը:

Գյուղական համայնքում պահպանվում էր նաև դրացիների միջև հին ավանդական փոխօգնությունը (մեջի), որը ի հայտ էր գալիս հատկապես դժբախտ դեպքերի առիթով, մանավանդ համայնքի շահերի համար զոհված մեկի անօգնական տնտեսության արտը հերկելու, ցանելու, հնձելու, փոխադրելու, կալսելու և ներս առնելու աշխատանքներում: Ուստի և փոխօգնության կիրառումը սահմանափակվում էր վարձու բանուժի կիրառումը: Դրացիների միջև տա-

րածված էր նաև կաթ փոխառու սովորությունը, որպեսզի այդպիսով ամեն մի տնտեսություն կարողանար պատրաստել իր ձմեռվա պաշար կաթնամթերքը՝ պանիր, յուղ, չորթան և այլն: Փոխօգնության այս ձևը մեծ նշանակություն ուներ հատկապես սակավաթիվ կթան ունեցող չքավոր ընտանիքի համար:

Հետաքրքրական են նաև Գամիրքի առանձին շրջանների որոշ գյուղերում հավաքական հյուրասիրության վերապրուվը, դրա որպես ցայտուն օրինակ. կարելի է նշել Արգեսոսի շրջանի Ճյուճյուն գյուղը: Այստեղ յուրաքանչյուր թաղ ուներ իր հասարակական օրգանը՝ հյուրանոցը, որը տվյալ ազգակցական թաղի հավաքական սեփականությունն էր հանդիսանում: Յուրաքանչյուր թաղ իր հյուրանոցում ընդունում էր այն անցորդ հյուրերին, որոնք նշանակվում էին տվյալ գյուղի քահայյի (ռայիսի, ռեսի) կողմից: Այսպես, եթե հյուրերը նշանակում էին ստանում, որ Կյուլապ-օղլուար թաղի օղալում պետք է գիշերեն, տվյալ թաղի տնտեսությունները, ըստ սովորության, հերթականությամբ հայթայթում էին հյուրերի ճաշը, տեղաշորը (անկողինը), ինչպես նաև նրանց անասունների կերը, ձմռան օրերին՝ հյուրանոցի ջեռուցումը: Տվյալ թաղի յուրաքանչյուր տնտեսություն ամեն տարի, աշնան վերջերին, սալլերով անտառից վառելափայտ էին փոխադրում և դարսում հյուրանոցի գետնահարկ պահեստում: Սակայն Գամիրքի ոչ բոլոր գյուղերում էր պահպանված հավաքական հյուրասիրության այդ ավանդական ձևը: Կային գյուղեր, ուր հյուրերը ընդունվում էին կալվածատեր աղայի կողմից, իսկ կառավարական պաշտոնյաները, հյուրասիրվում էին ընդհանրապես գյուղի քահայյի կողմից: Վերջիններիս հյուրասիրման համար, պարտադիր կարգով գյուղական համայնքը հատկացնում էր, ըստ գյուղի տնտեսությունների քանակի, տարեկան 300—400, մինչև 500 ղուռուշի մի գումար, իսկ նրանց ձիերի համար գարի, դարման կամ առվույտ էր հավաքվում կալի վրա, որը պահ էր տրվում գյուղում հարգված մի անձնավորության մոտ, կարիքի դեպքում մաս առ մաս վերցնելու համար:

Գյուղական համայնքի, ինչպես նաև աղ-

գակցական կցաթաղերի հին կենցաղի որ-
պես վերապրուկ, Գամիրքի հայկական գյու-
ղերում դեռևս պահպանվում էր աշխատան-
քային որոշ համագործակցություն, ոռոգ-
ման առունների մաքրման, ճանապարհների
և կամուրջների շինության ու վերանորոգ-
ման գործերից բացի, թաղերում աղբյուր,
ջրամբար կամ ջրհոր կառուցելու համար:


Ինչպես հայտնի է, Հայկական բարձրա-
վանդակի լեռնային պայմաններում ջրի
հարցը, դարերի ընթացքում հույժ կարևոր
հարց է հանդիսացել, ինչպես լեռնային
մարմանդներում անասնապահությանը ըզ-
բաղվողների, նույնպես և դաշտային վայ-
րերում երկրագործությանը զբաղվող բնակ-
չության համար: Ուստի ստեղծվել էին
ջրապահաստման և ջրաբաշխական բազմա-
պիսի ձևեր: Հին ջրապահաստման յուրա-
հատուկ ձևերի կիրառումը պահպանվել էր
հատկապես այն վայրերում, ուր բնական
պայմանները չեն թույլատրել բավարար
թվով աղբյուրների կառուցումը: Օրինակ,
Կեսարիայի շրջանում խմելու ջրի օգտա-
գործման ձևը ընդհանրապես ջրապահաս-
տային էր: Բացի այն, որ մեծահարուստ
տնտեսություններն ունեին իրենց սեփական
ջրամբարը, կային նաև թաղային ջրապա-
հաստներ, որոնց պատրաստումը և պարբե-
րական մաքրումը, վերանորոգումը կատար-
վում էր տվյալ ջրապահաստը օգտագործող
թաղի բնակիչների կողմից: Օրինակ, Ար-
գեսոսի շրջանի Ճյունձյուն գյուղում աղբյուր
չկար, այլ Արգեսոս լեռից հոսող առվի ջուրը
կավե խողովակներով (քյունգ) գյուղ բեր-
վելով, բաժանվում էր 24 ջրամբարների
(սահրինջ) մեջ: Ճյունձյուն գյուղի ջրամբարի
պատրաստման այդ յուրահատուկ ձևից ել-
նելով, պետք է ենթադրել, որ այն դարա-
վոր աշխատանքային փորձի ժառանգու-
թյուն էր: Ճյունձյուն գյուղը գտնվում էր Ար-
գեսոս լեռան հրաբխային ժայթքումներից
գոյացած քիւրեմ կոչված վարդագույն տու-
ֆաքարի կոնաձև մի սարահարթի վրա:
Ուստի և, պարզ է, որ ջրամբարը ամբող-
ջությամբ պետք է պատրաստվեր տուֆաքա-
րի մեջ: Սակայն տուֆաքարի վերին խավը
համեմատաբար փխրուն լինելով, անհրա-
ժեշտ էր հորատել 5—15 մետր խորություն՝
մինչև քիւրեմի ամուր շերտին հասնելը, որ-
պեսզի հնարավոր լիներ դրա մեջ գետնու-

ղի փորել: Չորս գետնուղի էին հորատում,
բերանները հորի հատակի վրա բացված,
որով ստացվում էր շորս թևերով մի հոր,
մի մեծածավալ ջրամբար, որից օգտվում
էին գյուղի շորս թաղերը: Ջրի պահպանման
և մաքրության համար ամբողջ ջրամբարը,
թունեներով հանդերձ, խորասանելով⁴³ ծեփե-
լով, մի քանի օր թողնում էին, որպեսզի
շորանա, իսկ կրի տհաճ համը վերացնելու
համար երկու երեք անգամ լվանում էին
ողջ ջրամբարը, ապա ջուրը բաց թողնում:
Ջրամբարի պատրաստումը, ինչպես և տա-
րեկան երկու անգամ մաքրումը (մարտ և
սեպտեմբեր ամիսներին). կատարվում էր
այն ազգակից դրացիների կողմից, որոնք
օգտագործում էին ջրամբարի ջուրը:

Կեսարիայի շրջանի հայկական գյուղե-
րում, ջրամբարի հավաքական պատրաս-
տումից և միասնաբար օգտագործումից
բացի, ազգակից դրացիների, բարեկամների,
ծանոթների կողմից փոխօգնություն էր ցույց
տրվում բնակարանների շինարարության,
ինչպես նաև կտուրների հողը վերափոխելու
համար, հատկապես սայլերով շտախ փո-
խադրելու գործում:

Գամիրքի արևելյան մասում գտնվող
Տիվրիկ ավանում նույնպես վազող ջրի
աղբյուր գոյություն չունեի: Ուստի և մի
քանի դրացիներ միասնաբար, պատրաս-
տում էին ջրհորի ձևով կլոր մի ջրամբար,
որը տեղական բարբառով կոչվում էր ջջվո
կամ ավելի փոքրը՝ գյոլ (լիճ), որը ավանի
միջից հոսող Չաթալ-չայի ջրից գիշերը լց-
նում էին և օգտագործում: Տարեկան երկու
անգամ էլ միասնաբար կատարում էին
ջրհորի տիղմը մաքրելու և անհրաժեշտու-
թյան դեպքում վերանորոգման աշխատանք-
ները: Կյուրիներ հարուստ էր խմելու ջրով:
Ամեն տնտեսություն ակ-ի մշտահոս ջրից
ունեի իր բաժինը, բացի Որեն թաղից, որի
բնակիչները կառուցում էին նույն ձևով
փոքր ջրամբար, որը կոչվում էր հավուզ,
բայց, ի տարբերություն մյուս շրջանների,
այստեղ ջուրը լցվում էր օրընդմեջ գիշեր
ժամանակ և ցերեկը օգտագործվում:

⁴³ Խորասանը պատրաստելու համար օգտագործ-
վում էր լվացված բարակ ավազ, մարած կիր, թոն-
րի կտորներ, մանր կտրտված կանեփի թել և ձվի
սպիտակուց:



Նկ. 24. Կեսարիայի շրջանի ժյուճյուն գյուղի քառաթև ջրամբարի (սահրինջ) գծագիրը:

Կեսարիայի արվարձան Քալաս ավանում նույնպես աղբյուր գոյություն չունեն, հետևաբար խմելու ջրի համար, եթե հարուստ տնտեսությունները պատրաստում էին իրենց սեփական ջրամբարը, ապա միջակ և աղքատ մի քանի դրացի տնտեսություններ,

միասին օգտագործելու համար, պատրաստում էին իրենց հավաքական ջրամբարը, ղուլմուն (թուրք. ջրհոր) և մշտապես լցնում Զինջիդարայից հոսող առվից: Ուշագրավ է, որ Զինջիդարայի առվի ջրով հնարավոր էր Քալաս ավանի վերի և վարի թաղերում մի

քանի աղբյուրներ կառուցել, սակայն նախապատվությունը տրվում էր ջրամբարում նստած ջրին, արմատացած մի սովորություն, որը երևի ավելի շուտ գալիս էր նստվածք տալով մաքրելու դիտավորությունից, քան թե հնուց մնացած: Կամ ինչ որ տեղից բերովի սովորություն:

Ջրամբարից շուր քաշելու համար, եթե քաղաքներում և քաղաքատիպ ավաններում օգտագործվում էր ձուլապ և նույնիսկ ձեռքի ջրհան փոքր մեքենա, ապա գյուղերում կիրառվում էր դուլը, ինչպես նաև ղաճքա-րը (լծակով շուր հանելը): Գամիրքի ինչպես գյուղերում, նույնպես և քաղաքներում, բացի սեփական և հավաքական ջրամբարներից կային նաև աղբյուրներ, որոնք կառուցված էին առանձին գերդաստանների կողմից և կրում էին նրանց անունը: Օրինակ, Չաթ գյուղում Վարդապետենք, Դեմիրճենք, Քեշիշօղլիենք ունեին իրենց կառուցած աղբյուրները, իսկ Թալաս ավանում, հատկապես Պալոդյանները՝ իրենց կրկնակի կամարներով 15×15×8 մետր հսկա ջրամբարը: Բայց ինչպես վերոհիշյալ աղբյուրների, նույնպես և ջրամբարի օգտագործումը հասարակաց էր:

Հատուկ հիշման արժանի են նաև Արգեոսի շրջանի Ճյուճյուն գյուղի երկու կողմի սահմանամերձ վայրերում կառուցված այն խայրեա⁴⁴-բարեգործական ջրամբարները, որոնք ծառայում էին անցորդներին և նրանց անասուններին ջուր մատակարարելուն: Ավելին, այդ գյուղի արտերի խողան թողնված մասում, ջրամբարի մոտ, ամեն տարի երկու օրավար տարածության վրա գյուղի համայնքի կողմից ցանվում, մշակվում էր նաև մի խայրեա պտղաբանջարանոց, որտեղից անցորդները մի քանի վարունգ, սեխ կամ ձմերուկ քաղելով հանգրստանում էին ջրամբարի ծառերի տակ և օրհնանք ու բարի ցանկություններ մաղթում գյուղին:

Այդպիսի օրինակելի և գեղեցիկ սովորությունների առկայությունը Գամիրքի հայկական գյուղերում հիշեցնում է հնագույն անցյալը, երբ տոհմերը իրենց բնակավայրերի սահմաններում, կենսամթերքներ էին թողնում այլ տոհմերի համար:

⁴⁴ Խայրեթ-խեյրեթ արաբ. նշանակում է բարեգործական նպատակով կատարված գործ:

Տոհմային հասարակության կենցաղից ու բարքերից մնացած այլ սովորություններ ևս կային, որոնց թեև ձևական կողմն էր որոշ չափով պահպանվել դասակարգային հասարակության պայմաններում, բայց բովանդակությունը որոշակիորեն փոխվել էր: Օրինակ, Կեսարիայի շրջանի նույն Ճյուճյուն, Թաշխան և այլ գյուղերում ցորենի ճորճերը գտնվում էին մի վայրում, այն տարբերությամբ միայն, որ փոխանակ ամբողջ համայնքի հացահատիկը միասին ամբարելու, յուրաքանչյուր տնտեսություն նույն վայրում ուներ իր առանձին ցորենի ճորճ: Վերջինս մի մեծ կարասի ձև ուներ, միայն թե փոխանակ կավից պատրաստված լինելու, քարափոր էր, ուղղակի տուֆաքարի մեջ: Արգեոս լեռան հրաբխային ժայթքումներից գոյացած քարը ցորենի ավելի էժան պահեստների պատրաստման հնարավորություն էր տալիս: Ի դեպ, Կապադովկիայում ցորենի շտեմարանները: հիշվում են շատ հին ժամանակներից, որոնց մեջ հատկապես իր օրակը պահպանում էր շուրջ 30 տարի: Այդ վկայում են հին պատմագիրներից՝ Վարոսը, Պլինիոսը և Թեոփրաստը, որ այդ շտեմարաններում պահված պեճառ կոչված ցորենը նույնիսկ 60—70 տարիների ընթացքում պիտանի էր հացի համար, իսկ 40 տարի՝ սերմանելու համար⁴⁵:

Դասակարգային հասարակության պայմաններում փոխվել էր նաև անասունների, հատկապես ոչխարների հոտի կազմության, ինչպես ասվում է՝ ճյուղ ճանելու հին ձևը: Անցյալում, բնափակ տնտեսության պայմաններում քանի դեռ նահապետական մեծ ընտանիքի ձևը ընդհանրություն էր հանդիսանում, յուրաքանչյուր գերդաստանի ոչխարները կազմում էին առանձին մի ճյուղ—հոտ, իսկ հովիվները լինում էին նույն գերդաստանի անդամներից, որով ինչպես ճյուղը, նույնպես և ամառանոցի արոտավայրը կոչվում էր այդ գերդաստանի անունով: Բայց հետագայում գյուղի շերտավորման ավելի խորացման հետևանքով, երբ սկսում են քայքայվել գերդաստանները և տնտեսությունները փոքրանալ, ճյուղի կազմությունը (հոտի կազմությունը) թեև պահում էր իր

⁴⁵ Տե՛ս «Հանգես Ամսօրեայ», Վիեննա, 1900, էջ 37:

ձևական կողմը, սակայն փոխվում էր իր ռոմանդակությամբ: Ժյուղազուխը, լինում էր ամենաշատ ոչխար ունեցողը (հետևաբար և կոչվում էր նրա անունով), սակայն ճյուղի անդամները՝ նրա թևերը լինում էին դրացիներ, ծանոթներ և բարեկամներ: Այսպես, ուրեմն, նյուզ հանելու ձևը ներկայացնում էր աղդատոհմային հին սովորության փոխարինումը մի մնացուկը, որտեղ նյուզազուխը գերդաստանի մեծի փոխարեն լինում էր ոչ-արյունակցական կապերով մեկը, որը շատ ոչխարներ ուներ: Այնուամենայնիվ, այդ նյուզազուխը, նյուզի դեկավարը լինելով հանդերձ, նյուզի մաս կազմող ընտանիքների սեփականությունը տնօրինելու ոչ մի իրավունք չունեի, այլ պարզապես նյուզի ընդհանուր գործերի վարչին էր հանդիսանում: Օրինակ, նյուզազուխը իր թևերին հովվի հետ խորհրդակցության էր կանչում, հովվի վարձատրության, նրա օրական սննդի՝ հացի չափը և ըստ ոչխարի գլխաքանակի, հերթականությունը որոշելու համար: Իսկ Գամիրքի որոշ շրջաններում նյուզազուխն ինքն էր հովվի վարձում, հայթայթում նրա սնունդը, զգեստը և թևերից զանձում էր յուրաքանչյուր ոչխարի համար որոշված գումարը մինչև քսան ոչխարից մի թուխի:

Զյուզի ներքին գործերի տնօրինման մեջ, եթե նրա թևերը բերում էին իրենց մասնակցությունը, ապա գյուղի համայնական արոտատեղերի պահպանման, արածեցման վերաբերյալ որոշումները ընդհանրապես կայացվում էին քյահյայի գլխավորությամբ, մեծ անասնատեր ճյուղազուխների խորհրդակցությունում: Այլ խոսքով, հեռմակ մոտոները (մուխթար) չորպաճիի գլխավորությամբ կարգադրում էին գյուղական համայնքի վերաբերյալ բոլոր գործերը⁴⁶:

Այսպես, գյուղի շերտավորման պայմաններում, թեև ճյուղի (ոչխարի հոտ) գործերի վարման բնագավառում պահպանվել էին տոհմային հասարակության հին կենցաղային որոշ մնացուկներ, սակայն գյուղում առևտրական հարաբերությունների աշխուժացման հետևանքով ստեղծվել էին նաև շահադիտական նոր փոխհարաբերու-

թյուններ: Օրինակ, ճյուղի անդամ լինելը, սարում դրկիցությունը կախված էր գլխավորապես ճյուղազուխի կամքից: Ուստի, ամառանոցների գերդաստանային սեփականության ձևը թեև իր բովանդակության մեջ որոշ փոփոխության էր ենթարկվել, սակայն նյուզազուխը իր գերդաստանի համայնքային սեփականությունը, հատկապես յայլատեղին տնօրինելու իրավունքը դեռևս պահում էր իր ձեռքին: Այսուհանդերձ, յուրաքանչյուր գյուղ իր համայնքային յայլատեղին, արոտատեղիները, մարգագետինները մեծ կալվածատեր աղաների և կամ ուրիշ գյուղերի ոտնձգություններից պաշտպանելու համար, հավաքական դիմադրություն էր կազմակերպում: Օրինակ, Հալիս գետի վերին հովտի Կովտուն գյուղը խորսանայի դեմ տարիներ շարունակ կռիվ էր մղում արոտատեղիների համար: Դա այդպես էր ոչ միայն գյուղերի, այլև ազգակցական տարբեր թաղերի միջև. թաղը որևէ հարձակման ժամանակ հավաքական դիմադրություն էր կազմակերպում: Ազգակցական կցաթաղում ապրող ազգակից հարևանները թեկուզ իրար հետ խռով լինելին, ազգառոմմի պատվի համար միացյալ ուժերով կռվի էին դուրս գալիս հարձակվողի դեմ:

Դասակարգային հասարակարգի պայմաններում այդպիսի նեղ ազգակցական համագործակցության երևույթների կողքին, առկա էր նաև գյուղական համայնքների պայքարի ավելի լայն համագործակցություն, ընդ որում ոչ-ազգակից և ոչ-կրոնական տարբեր գյուղական համայնքներ միանում էին ընդդեմ իրենց շահագործողի: Այսպես, Սարոսի հովտում Զամանդի (Մամլեդավ) գետի մոտակա յոթ գյուղերից երեքը՝ Յաղտը պուրուն, Ղազլը Կոմեդի, Ենիջե (հայկական) և չորսը թուրքական՝ Յուսեյուննու, Փունդու, Մեկենգի, Բուդաջը վարձակալային շատ ծանր պայմաններով օգտագործում էին Ների-բեկի թիմարային հողերը, սակայն սուլթան Համիդի գահընկեցությունից հետո (1908 թ.) գյուղացիները միացյալ ուժերով երկար տարիների դատավարությունից հետո, մասամբ թեթևացնում են իրենց պարտքերը:

Գամիրքի հայերի կենցաղային սովորությունների մեջ դեռևս որոշակի տեղ էին գրավում նաև բնության զարթոնքի, ինչպես

⁴⁶ Տե՛ս Հեկոբ Ա. Արզումանյան, էվերեկի պատմությունը, Ա. գիրք, Գահիրե, 1935, էջ 27:

նաև արհամարհանքների՝ երաշտի, հեղեղների, մորեխի ժամանակ հավաքական մատաղի, հասարակաց աղոթքի, ուխտագնաքոթյան և այլ վերապրուկներ:

Հիշենք որպես նմուշ բնության զարթոնքի, հետագայում քրիստոնեականի վերածված զատկի տոնի առթիվ Կեսարիայի շրջանի էվերեկ ավանում կատարված զոհաբերությունը, որը իր ձևով ամենահատկանշականն էր, իսկ իր բովանդակությամբ արտացոլում էր հին հեթանոսական արարողությունները: Ըստ հնամենի սովորության, քահանան զատկի առթիվ իր ծովսերից մաաաղցու հավաքելով, զոհաբերություն էր անում իր տան մեջ և բաժանում այնպես, ինչպես անցյալում անում էին տաճարի բրմերը: Ավելի ուշ ժամանակներում, XIX դարի 50-ական թվականներին, կրակ օգտագործող բոլոր արհեստավորները՝ կլայեկագործները, երկաթագործները, դերձակները, ինչպես և սափրիչները ավանի բոլոր բնակիչների մասնակցությամբ մատաղի համար գնում էին 11 եզ: Եզները զատիկ շաբաթ օրը տարվում էին եկեղեցու բակը, եղջուրներին վառած մոմ կպցրած և քահանանը աղոթելով, օրհնում էին անասուններին, որից հետո կազմ ու պատրաստ սպասող մսագործները անասուններին մորթում, մաքրում և հանձնում էին եկեղեցու խուց խոնի առջև նստած ծերունիներին, որպեսզի միսը մանրեն, իսկ կանայք եկեղեցու բակում նստած սոխ էին մաքրում, մինչ երիտասարդները էջի մեջքին կողովներ կապած, առջևից էլ շարքով երեխաներ

մատաղացու բեռն գողալով, պտտում էին թաղից թաղ: Յուրաքանչյուր տնտեսություն տալիս էր, ըստ իր կարողության, սոխ, կորկոտ, յուղ և այլն: Այդպես մինչև երեկո ամեն ինչ արդեն պատրաստ էր լինում և արհեստավորների աշակերտները պատրաստած օջախի վրա եփում էին մատաղը:

Կիրակի առավոտյան զատկի արարողությունից հետո եկեղեցուց դուրս եկող տղամարդիկ, հարուստ թե աղքատ, անխտիր, խառն նստում էին եկեղեցու բակում փրված փսիաթների վրա, տարածելով իրենց անձեռոցը, իսկ վրան՝ տնից բերված գդալն ու դանակը, այլև հին հայկական փայտից երկճյուղ պատառաքաղը, սպասելով ժամարար քահանայի օրհնությունը: Իսկ ժամարար քահանան, զգեստավորված առաջնորդվում էր մինչև եկեղեցու դուռը, ապա կանգնում էր բարձր սանդղաստիճանի վրա և կարդում վերջին աղոթքը, որից հետո նրատաճներին բաժանվում էր մատաղը: Կանայք չէին մասնակցում ընդհանրական սեղանին, բայց ամեն ընտանիքից մի կին վերցնում էր մեկ-մեկ աման խաշած միս ու քեշկեկ⁴⁷ (կորկոտ-հարիսան):

Այս բոլորը գուցե հետագայում Անահիտի պաշտամունքի հետ կապված և ծիսական արարողության կերպարանք ստացած մի վերապրուկ էր, որը դարերի ընթացքում ենթարկվել էր մի շարք փոփոխությունների:

⁴⁷ Հակոբ Ա. Արզումանյան, էվերեկի պատմությունը, Գահրե, 1935, էջ 28—32.